

大

隱


集

李

正成


大隱集

欽定四庫全書



大隱集卷一

宋 李正民 撰



制

朱勝非觀文殿大學士知洪州制

勅通班祕殿地冠禁嚴作牧大邦望隆屏翰匪我舊弼
曷稱茂恩具官德宇靖深材猷博敏懿文足以華國
議足以濟時徧歷禁塗薦更政府適屬省方之日進躋
次輔之聯遽解繁機易臨近郡朕惟君臣相與之際既

諒乃誠而進退曲全之間重違所請眷鍾陵之都會實
江表之上游繫我宗工鎮之南服乃申前命庸便爾私
噫廊廟期年克保初終之節湖山千里允資綏撫之方
毋有遐心竚聞報政可

觀文殿學士中太一宮使除右弼制

門下鳴玉曳履夙隆祕殿之班當軸處中尤慎西臺之
長眷惟舊德方領真祠宜錫命書還弼予治具官某風
猷凝遠器宇端方才周萬務之原學貫六經之奧懷文

抱質彬彬君子之儒效信納忠蹇蹇王臣之節早騰令
聞浸歷要途惟中外之薦更嘉勲勞之備著言皆可績
每堅享上之誠知無不為確守致君之義旋躋華於清
禁仍均逸於殊庭陪輔燕朝有獻納論思之益雍容琳
館適冲虛恬淡之遊雖高難進之風殊鬱具瞻之望朕
方循名而責實稽古以建官耳目股肱增重廟堂之選
左右前後肇新輔佐之聯必惟其人久虛乃位往踐厥
服莫如汝諧勩相鈞衡允賴訏謨之助典司機密聿觀

政事之修載示寵光庸昭體貌於戲尊德樂道王者所以立太平之基經體贊元賢人所以成可大之業茂摠其蘊永孚于休可

王棟贈資政殿學士制

勅志能之士因時而立功名封疆之臣守死而明節義既嘆捐軀之易宜推卹典之隆具官出自相門躋于待從智勇足以杆難恩惠足以撫民久領近邦遠逢外寇力振孤軍之氣屢摧強敵之鋒饜既甚於析骸食殆窮於掘鼠睢陽無援張巡之志不衰東郡久圍臧洪之辭靡屈雖勢窮而力盡終身殞而名存特弁祕殿之華資俾視政塗之寵數用彰死節加賁泉扃式慰冥漠之知聿為忠義之勸可

顏岐資政殿學士宮祠制

勅朕憂勤庶政思濟艱難進退大臣矜全體貌具官早以材望聞於搢紳徧更侍從之華進秉國鈞衡之重贊襄滋久裨益居多方隆注倚之懷遽有便安之請察其

雅志益亦重違加祕殿之寵名領殊廷之館御庸昭朕
眷庶便爾私噫邦國多虞賴君子經綸之蘊燕間自適
蹈大雅明哲之方毋有遐心對予休命可

范宗尹除參知政事制

勅朕履險阻艱難之會懷宗廟社稷之憂迫蹙侵陵曾
無寧歲震蕩播越靡有奠居思得豪英之材共濟阽危
之運具官某清明而博達簡重而粹夷與學貫於本元
沈謀周於事物惟衆口易諛之日當諸儒射策之辰首

發讜言力扶頽俗逮寇難之遽作以直諫而見思擢置
憲臺遂躋諫省比召從於外服旋進長於中司慷慨濟
時之心密勿安邦之論屢觀獻納灼見忠嘉宜峻陟於
文階俾參陪於正路天下之勢如置噐必審處於安危
邦家之基在得賢每因人而輕重徃服朕命其遠乃猷
可

張守翰林學士制

勅帝王有所號令前代議者謂其難能文章施於朝廷

近世儒臣以為榮遇矧在險阻艱難之際欲圖德意志慮之孚入直禁林必符雅望具官性資鯁亮材術周通奧學貫乎九流高文兼於衆體訓詞深厚允資西掖潤色之工議論堅明更顯南司糾彈之峻薛宣舉措之當理真卿繩治如平時比懇解於憲綱乃力祈於外補朕惟爾久居臺閣宜在朝廷俾參宗伯之官將典行臺之政載念北門之邃夙傳內相之稱警蹕時巡文書雲委方用兵如至德式求深謀密議之咨詢必下詔若奉天可使悍卒武夫之感涕力行爾學庸稱朕恩可

劉洪道除直顯謨閣制

勅國家承平日久州縣之官非文法吏即書生也自外敵馮陵詭繼以寇盜二千石而下顛沛失據莫能枝梧而元元之衆病矣此朕焦心勞思求慷慨之士為吾杆禦以慰安斯民也爾奮身庠序早更任使青齊之郊實爾桑梓之地乃能糾率司徒撫寧三郡奏功來上朕用汝嘉峻陟文階進直延閣益圖來効庸稱茂恩可

程昌寓直顯謨閣制

勅國家承平日久

至以慰安斯民也同前

爾智畧深茂材力強勉

承淮蔡傷殘之後而能耐循疲瘵繕修守恪朕用嘉之
乃俾進職二等以為爾勸昔漢二千石有治理効輒增
秩賜金以表寵之爾宜體朕意益懋爾庸尚有保息以
須後效可

晁公為直顯謨閣制

勅具官延閣寓直儒臣清選二千石有治理効輒畀以
美名所以示勸也爾服勤文藝不墜家聲承流海邦敏
於從政來朝行在朕用汝嘉其繇中秘之嚴躡進文謨
之直徃欽朕命尚勉厥修可

胡寅直龍圖閣宮觀制

勅具官國家祥符中肇建延閣以奉祖宗謨訓華榜昭
揭擬古河圖乃置學士待制等員以為縉紳勸譽處而
資望未至者亦俾寓直其間迄今為五閣之冠其選任
豈不美哉爾儒稚端亮躋於柱史乃以親疾祈便奉養

貼以峻職處之祠庭爾其益勵忠孝之節以待異時之用尚其勉之可

王賓追復龍圖閣學士制

勅赦過宥罪惠傳及於多方隱卒崇終禮夙優於近列乃眷論思之舊肆頌甄叙之恩具官學問深醇性資直諒事朕干戈之際脩殫羈勒之勞粵自臺端亟躋諫省進執中司之法旋更八座之聯獻納居多每盡心於啟沃忠誠自許侵忤意於貴權遂貽貝錦之傷徃就祠庭之逸方思圖任遽嘆淪亡念沛澤之薦更矧嘉言之猶在俾復河圖之職聿為寔宥之光思典有加幽冥無憾緬維精爽尚克欽承可

王朋約贈直龍圖閣制

勅具官朕頃者省方淮甸移蹕江吳念斥候之不明駭風塵之甚遽衣冠頓踣倪耄震驚眷惟在服之臣不及巨川之躋隕於非命朕甚傷之爾列職周行宣勞王事奄罹物故適丁斯時其進直於河圖仍優加於恩典庶

幾冥漠尚克欽承可

劉晏直龍圖閣制

勅其官比自外敵馮陵繼以寇盜其能先登賈勇以挫其鋒者鮮矣爾以忠力自奮糾率戎行阻溢鼓儻殺敵決勝乃俾進直河圖以為爾勸是謂不次之賞矣其益思所以稱之可

劉榕除直龍圖閣制

勅濟陰大邦也自敵國侵暴之後寇攘競擾二千石能保其封疆亦已難矣爾頃以材猷往膺郡寄閱時滋久宣力居多乃俾進直河圖以為勸傳不云乎有功而見知則說矣尚勉之哉可

劉洪道直龍圖閣制

勅朕惟海岱之區絲枲之利號為冠帶衣履天下自頃群盜相挺兵無寧歲田萊多荒呻吟未息其能攘却醜類以保斯民者可無褒勸之恩哉爾早膺任使總制東秦而能勦除鯨鯢撫綏疫疾河圖之直文階之峻併以

命爾式獎賢勞往服恩榮益登乃績可

李擢徽猷閣待制制

勅朕惟祖宗聖神相繼咸有謨訓載在方冊歷代寶之藏於延閣又命儒學之士寓直其間以為咨訪討論之地其選任顧不美哉具官文辭之敏行義之良早被徵求薦躋華貫掖垣瑣闥嘗已踐更屬時艱老久辭著位宜還次對之選以備內朝之臣徃即欽承無忘勵翼可

何志同復待制制

勅紹履尊極康濟艱難思得四海賢雋豪傑之士共圖興復庶臻嘉靖矧嘗位禁從之臣豈宜置而不用哉具官問學淹該器質粹純典令編摩之任優游禮樂之司遂進長於天官旋躋華於秘殿比從物議稍黜近班宜推起廢之仁復還次對之選尚思勵翼庸副眷懷可

康允之除徽猷閣待制制

勅國家肇建延閣以奉祖宗謨訓翬飛跂翼邃在西清乃置學士待制等員以為搢紳譽處二千石有治理効

輒畀以美名聯于法從所以示褒勸也具官某懷應務
之材有御衆之略早更煩使克著能聲比守壽陽屢推
強敵速移鎮於武林而能寓兵於農鼓作士氣為戰守
備忠績可嘉宜還次對之班增重名藩之寄夫膺文儒
之選以論思獻納為先專方面之權以鎮禦撫綏為重
益圖來效庸稱朕恩可

劉洪道除待制制

勅國家肇建延閣以奉祖宗謨訓又置學士待制等員
以為縉紳譽處二千石有治理效輒畀以美名所以示
褒勸也具官智略深沈材猷敏達早膺顯授總制東秦
保全一方攘卻勍敵宜升次對之秩增重連城之寄斯
為高選其益懋哉可

商守拙待制制

勅延閣謨訓所載西清咨訪之地靡勞心於文墨將次
對於燕閒爰渙茂恩用優耆德具官處躬純厚應務詳
明練達國章進躋廷尉釋之議罪每見於持平陳寵獻

言務從於矜恕擢司憲部允賴老成廼引疾以陳辭欲就閔而去位朕法仁祖之寬厚舉嘉佑之詔條讞議頗殊於重輕著令未分於甲乙必資明習文法之士以定摩研編削之規雖遽去於朝廷宜勉留於祠館往新藥石之輔少須符竹之行尚究乃心圖稱朕命可

范直方直秘閣參議官制

勅惟爾曾大父仲淹方未顯時慨然已有憂天下之志晚更大任名重華夷輔政臨戎咸有成績深謀讜議人到於今稱之爾漸摩餘訓克守家法服采列朝未究爾能乃俾奪情進直延閣參吾行營之議朕將觀爾之材而試用之矣尚勉之哉毋忝朕命可

張上行直秘閣制

勅具官漢自宣帝綜覈名實二千石有治理効輒增秩賜金或爵至關內侯故漢世良吏於是為盛稱中興焉爾頃以材猷往臨群寄兵既服於紀律民遂安於里閭冉駝妥安巴夔靜謐俾進直於延閣用旌表於爾勞思

稱朕恩益圖來效可

胡考寧直秘閣制

勅具官中秘寓直清選也異時文學材能之士咸得充職其間所以勸在列而起治功也爾倅貳襄陽屢當寇敵踰年保守宣力惟多則汝之材能可見矣乃俾進直以為爾勸是曰優寵其益懋哉

賈惇詩直秘閣制

勅具官中秘圖書之府朝廷以為清選異時文學材能之士咸得充職其間所以勸在列而起治功也爾倅貳淮邦克圖固守因事獻策忠義可嘉乃俾進直以為爾勸是曰優寵其益懋哉

陳國瑞直秘閣制

勅具官惟我太宗崇儒右文肇建秘閣奎壁之畫昭回在上又命儒學之臣寓直其間以為咨訪討論之地諒非名人未易稱選爾以材猷之敏將漕浙部錫對便殿敷納可嘉進直中秘之嚴增重皇華之寄徃祇朕命益

究乃心可

梁汝嘉直秘閣制

勅中秘寓直清選也異時文學材能之士咸得在職其間所以勸在列而起治功也爾倅貳支郡服采惟勤朕比因時巡再臨澗部供帳趨辦民不告勞則爾之才能可見矣自頃貳車未嘗貼以秘職今以命爾是為優恩其尚知勸而勉哉可

向子伋直秘閣制

勅惟我太宗崇儒右文肇建秘閣奎壁之畫昭回在上乃命儒學之臣寓直其間以為咨訪討論之地自匪名人未易稱選爾以材猷往膺郡寄踰年於此治効已彰宜增重於麾符俾進職於中秘益思砥勵圖稱恩榮可

勝膺直秘閣制

勅國家承平日久州縣之間非文法吏即書生也自外敵馮陵繼以寇盜二千石部使者顛沛失據莫能枝梧而元元之衆病矣此朕焦心勞思求慷慨之士以將使

指而慰安斯民也爾智略深茂材術強敏早繇州掾能禦賊鋒倅貳淮陽克著聲績自被皇華之選尤嘉宣力之勤進直秘嚴以為爾寵宜體朕心勉乞爾庸尚有褒息以須後効可

陳機直秘閣制

勅具官爾以艱難之時居郡守之任繕修備禦揆度事幾奏牘詳明達于行在察其忠蓋朕用汝嘉進直中秘之嚴增重一邦之寄益固來效庸稱朕恩可

趙不羣直秘閣制

勅具官中秘寓直清選也異時文學智能之士咸得充職其間所以勸在列而起治功也爾頃以邑令能禦強敵擢貳郡政宣力尤勤比涉鯨波朝于行在論事中理朕甚嘉之乃俾升華延閣倅于近郡是為優寵其益懋哉

萬格監察御史制

勅具官御史府朝廷紀綱所寄自分建六察以督文昌

諸曹之政事凡有稽違皆得糾而治之於是抨彈之職益為雄峻爾剛介不屈儒學自得黌舍郎曹譽處休顯宜易冰廳之簡往踐霜臺之嚴爾其澄肅官僚振舉法度斯為稱職尚勉之哉可

楊焯禮監察御史制

勅國家自元豐中始正御史之職以分察文昌六曹之政事視唐推彈公解雜事之制為加詳矣於是樞機周密品式備具上下相維莫有苟且之意迄於今而遵用之宜擇其人俾修厥職爾論平正經術深醇茲用擢置臺屬以司糾察之事傳不云乎人有所不為然後可以有為朕觀汝之靖共守道不求合於當世之人今或可以有為矣尚其勉哉可

沈與求殿中侍御史制

勅御史府朝廷綱紀之地臺綱正則朝廷治朝廷治則天下理故選用寮屬必得實材爾問學多通議論持正比自師儒之官錫對便殿嘉爾浮納擢置抨彈乃能遇

事慨然無所枉撓旋更部署未究爾長其執法於殿中以糾繩於列位爾其毋畏拂指毋憚當權知無不言以廣朕耳目之寄斯為稱職尚勉之哉可

趙鼎侍御史制

勅憲府職在糾彈臺端號為雄劇維持政體督察官邪儻正色而立朝可不繩而自肅爾材猷敏達議論堅明嘗賦命於使華旋記功於選部頃繇諫省執法殿中不為義疚而利回豈以剛吐而柔茹抨彈既允禪益居多其升橫榻之嚴進貳中司之峻惟爾之任職者見於已試而朕之用爾者益以叙遷益奮忠_厥矣俟多訓可

胡寅富直柔左右史制

勅左右置史言動必書自艱難以來或廢典籍而不錄然春秋之義嘗繫日月而無遺若時記注之臣思得譽髦之士以爾寅胡相之秀直諒多聞以爾直柔名臣之孫儒雅蘊藉宜並司于國志以對待於螭坳徃修厥官無添朕命可

趙鼎除御史中丞制

勅昔諫議大夫鄭昌有言山有猛獸藜藿為之不採是以汲黯在朝淮南寢謀干木處魏諸侯息兵矧居網紀之地持糾彈之權為吾終執法者乎試得人而任之則精神折衝有見於朝廷之上矣具官操行直方志氣剛大既潔身而無黨毋論事而不回自總雜端風節甚峻屬中司之虛位顧橫榻之久專宜進長於南臺俾澄肅於在列真卿之當至繩治不異於平時孔緯之在鳳翔造朝獨先於百辟勿以擾擾而廢厥職思於艱難而盡其忠往體訓言期予于治可

汪藻給事中制

勅黃門列職均為侍從之臣東省設官乃專論駁之任擇人而授歷代攸艱雖官曹沿革之制不同而政令書讀之事則一匪時髦傑弗以次遷具官某襟度粹夷性資端亮夙蘊貫穿淹該之學發為經竒偉麗之文薦長贊書動無滯思簡嚴而蔚中舒最得於古風純厚而明

元稹遂變於時體雖稱辨事允賢勞宜進質於瑣闥俾更直於鼇禁當官不撓尚觀批^勅之言論事必行更効回天之力益堅爾守庸稱朕息可

胡安國除給事中制

勅朕惟祖宗時中書門下合而為一而封駁之官實在銀臺不廢職肆朕纂服屬時艱難爰舉舊章務從簡易塗歸之任必惟其人具官某以文學甲儒科以德行著閭里嘉言讜議顯於朝廷朕方康濟阡危寤寐賢俊宜為朕起復還邇聯爾其守乃節修乃職凡詔勅有未善除授有不當悉論而駁正之勿使批勅之名獨專於前世尚勉之哉可

周望給事中制

勅^{上詞}具官某操履清修志氣剛大頃求人而將命乃狗義以請行遂旌爾勞浸涉華貴比戎車之及境復抗節以出疆軺傳載馳能達國命孔子不云乎行已有恥使於四方不辱君命可謂士矣爾其守乃節修乃職凡

詔勅有未善除授有不當悉抗論而駁正之勿使批勅之名獨專於前世則於爾為無愧矣尚勉之哉可

謝克家兵部尚書制

勅文昌分理萬務武部實掌五兵自國家復董正之聯視前代有因革之異軍政歸於樞府右選摠於天官品秩高華文書清簡匪時賢德曷稱褒遷具官材度宏深性資忠厚殖學造古人之蘊摘辭追作者之英早師表於儒宮遂翺翔於諫省文章爾雅入更四境之遊悃悞無華出載列城之譽久辭著位想見儀形比錫對於便朝實副懷於虛佇宜陟中兵之長進聯八座之崇時屬多虞朝方尚武雖軍旅征伐必資廟筭之奇而獻納論思允賴辰猷之告益殫忠藎圖濟艱難可

魯楫禮部尚書制

勅文昌兼總六聯宗伯實典三禱祠祭祀之事既繫於司存學校選舉之文悉掌其政令比屬干戈之擾靡聞典籍之傳必求其人俾領厥事具官風猷莊重德宇粹

溫學談六藝之醇文檀四科之美早馳聲於庠序旋任
職於詞垣浸升延閣之班出奉名藩之寄朕造罹變故
躬總師徒既垂囊於爾邦遂駐驛於近甸首修朝貢深
嘆忠勤念及去於周行適來還於翰苑宜陟春官之長
進聯八座之崇時屬多虞朝方右武軍禮以同邦國亦
惟爾職之脩方岳以朝諸侯更講時巡之制益殫忠蓋
圖濟艱難

鄭望之吏部侍郎制

勅唐右列三銓掌於武部本朝肇分四選總於天官方
時多虞允號難治惟品流之龐雜員患其多矧典籍之
散亡吏得以肆欲司厥事必惟其人具官某識慮精明
材猷敏濟頃即曾之分職正戎馬之在郊奮身請行抗
節而出遂陟近班之峻以昭信誓之勞旋詢公言乃從
遠適茲召還於著位將協濟於事功俾參常伯之聯專
掌武階之衆爾其糾摘真偽審覈條章人無滯留之嗟
史絕欺罔之弊斯為稱職尚勉之哉可

劉珣吏部侍郎制

勅天官之選吏員猥衆簿書叢雜在承平時號為難治
 頃自巡幸浙右典籍多為煨燼凡在選之士自一命而
 上功罪履歷之實漫不可考自非精明吏治而習知其
 事者孰能勝斯任哉具官識度詳明政事練達居懷憂
 國之慮薦貢救時之言頃貳選曹僉謂平允分符出守
 曾未淹時宜還法從之聯復典中銓之寄爾其區別賢
 良糾正隱慝使吏無得並緣為姦時乃之休是為稱職
 可

葉份戶部侍郎制

勅國家之務用度為急祖宗循五代之制總於三司元
 豐復六官之聯歸於戶部比緣多故稍革舊章兵食所
 資費出彌廣典領厥事實難其人具官某智畧疏通材
 資敏達薦更事任綽著能稱糾察省綱總臨曹運朕方
 時巡江左式遏寇攘春茲百萬之師奚止千金之費資
 爾心畫以餉五軍擢參法從之班徃貳地官之任爾其

金定四庫全書 卷一
裁制盈虛幹旋多寡使朕有足食足兵之信茲為稱職
尚勉之哉可

李迨除戶部侍郎制

勅文昌政事之本源民部財賦之管轄兼周官司徒司
會之職總唐室度支鹽鐵之權于時列曹號為劇任欲
貳厥事每難其人具官某智術週通材資夙給服勞即
序已觀心計之良列屬宰庭克著聲猷之美干戈未定
調方繁全師駐欲會稽饋餉資于左戶俾陟貳卿之峻
往圖經費之充士飽而嬉無乏千千之用師直為壯佇
收三捷之勲尚悉乃心期稱朕命可

黃槩兵部侍郎制

勅國家自祖宗以來聚天下之兵於京師尺籍伍符付
之列將牙璋虎節祕在樞庭夏官所掌特其名與數而
已厥今國步方艱外患未弭五兵之寄視承平為重疇
咨庶位我得其人具官風力敏強性資超邁試之選部
而銓總平允列于宰屬而糾察嚴明遂進直於河圖俾

按臨於蜀道惜其遠去宜為朕留擢居法從之聯進參
帷幄之議朕方時巡江左式遏寇攘資爾謀猷濟予經
畫尚恢遠畧庸報異恩可

勅文昌陳邦光除刑部侍郎制

勅文昌六卿之貳品秩維均憲部三典是司條章滋衆
矧在險阻艱難之際凡居論思獻納之聯思協公言必
圖夙望具官某論辯閎博問學淹通文足以廣國華財
足以通世務望之射策早擢於科甲主父奏書嘗嗟於

晚見遂陟西垣之峻旋臨南夏之雄無施不宜所居可
紀向召從於遠服趣來還於近班逮此造朝久符前席
宜輟司於國用俾總讞於邦刑傳古議以決疑其克修
於爾職有嘉猷則入告尚益究於乃心濟時多艱對予
休命可

鄭望之工部侍郎制

勅文昌為萬化之源水部掌百工之事雖繕修營造在
巡幸之日有不暇為而獻納論思凡侍從之臣悉資辰

告肆頌明命褒進邇僚具官某知術疏通材猷敏達薦
更事任綽著能稱當虜騎之濟河以單車而出使遂脩
隣好峻陟近班速信誓之載渝徇公而而遠適朕方時
巡江左式遏寇攘思得豪俊之人共濟艱難之運爾頃
緣使事能察虜情宜還持橐之聯俾贊籌帷之密濟予
經畫賴爾謀猷往稱茂思尚恢遠御可

大隱集卷一

欽定四庫全書

大隱集卷二

宋

李正民 撰

制

鄭士彥除吏部員外郎制

勅天官之選吏員猥衆簿書叢雜在承平時號稱難治
自擾攘以來人懷欺誕吏緣為姦必得明敏之士以為
其屬爾材猷之美列職奉常進擢卽曾俾贊銓綜是為
高選其益懋哉可

沈與求兵部員外郎制

勅具官漢以尚書為中臺御史為憲臺二者地望略等自唐以來南省為重國朝以臺察省雖任職不同其選則均也爾以儒學之美列屬推彈議論慨然風采振起為郎武部其職甚清徃祇厥官嗣有褒陟可

韓裕兵部員外郎制

勅具官朕觀春秋之際列國公卿大夫之子孫咸以材能表見於世朕甚嘉之爾名臣之後儒雅自將學以從政有如寒士擢居郎屬用顯爾長徃祇厥官嗣有褒寵可

潘因刑部員外郎制

勅昔路溫舒患治獄之吏以刻為明以謂奏當之成雖咎繇聽之為死有餘辜何則成鍊者衆文致之罪明也今朕設憲部之官以掌天下之奏讞務從寬恕又以爾明察俾為之屬其深惟前載之言以廣吾好生之德則予汝嘉可

惠柔民禮部萬格祠部並員外郎制

勅某官等文昌之政兼總治官宗伯之聯特為清選掌南宮之章奏舉祀典之禮文列屬其間必求名士爾等由庠序進以儒學稱宜參郎位之華往佐春官之長各恭爾事勿替厥勤可

成大亨祠部員外郎制

勅文昌六聯分理萬務諸曹郎吏列屬其間雖煩簡不同而選任均也爾以材猷早居憲部出臨漕計宣力惟多還陟祠曹素號清選往修爾職其益懋哉可

王禹得禮部員外郎制

勅具官宗伯之屬掌禮文表奏之事號為南宮舍人自非名流不在其選爾儒學操履稱於時不忤不求恬於進取其升華於郎位俾列職於春官益勵厥修時有褒寵可

王昴駕部員外郎制

勅具官文昌六聯分理萬務自頃裁損濫員而郎選重

矣爾以強學待問名冠多士書林省戶皆非踐更譽處
既休器業彌茂惟輿輦車乘之政屬於武都職清而事
簡亦儒者之所宜居也今以命爾其往懋哉可

韓古都官員外郎制

勅都官之名尚矣在漢為司棊校尉之屬糾中都官不
法事自後凡盜賊臧獲部曲俘囚之事悉掌之於今為
刑曹之聯而職事視前世則簡矣爾以材猷薦更任使
其升華於郎位俾列屬於秋官往既乃心嗣有褒陟可

張閭等並諸曹員外郎制

勅張閭等文昌天府衆務泉藪內外折衷遠近稟仰而
諸曹郎吏分職其間雖煩簡不同其選任則均也爾等
或以儒學進或以才能顯譽處之美有聞於時並趨丹
地之嚴往佐列曹之長各恭爾事勿怠厥修可

韓肖曹左司員外郎制

勅具官昔唐太宗謂房元齡曰公為僕謝廣訪賢賢材
比聞閱訟牒日數百豈暇求於人哉因勅細務屬左右

丞大政乃闕僕射今朕當艱難之時方以戰守大策責成宰輔而左司郎官乃冢司之屬也凡文昌細務宜悉以付之則選任之意視平時為加重矣以爾名臣之孫踐更省府老成鍊達裁專詳明是用命爾以尚書左司之事爾其彌綸省闈糾正紀綱使大臣不勞而庶事皆理時乃之休嗣有褒陟可

張公濟除右司員外郎制

勅具官國家元豐中肇建文昌以六曹分總天下之事而提綱振領實在都司必得明敏之士乃堪其選爾以儒雅緣飾吏事練達世務僉謂老成久參郎位之華既預列卿之貳比持使節士譽益孚其躋省闈之嚴以參宰士之列是為遴柬尚勉之哉可

李承造右司員外郎制

勅上詞同以爾名臣之孫聞見殫洽忠義之氣勇於敢為是用命爾以尚書右司之事下詞同可

管思可度支員外郎制

勅地官之職素好繁冗自頃裁損濫員而太府司農出納之數悉隸其間期會簿書視前日尤劇為之屬者可不遴其選哉爾樞臣之後材諳有為久服官常所臨必最宜還即位總覈邦財其既乃心毋乏吾用可

韓球度支員外郎制

勅具官古人有言曰千里饋士士有饑色樵蘇後爨師不宿飽今朕命相臣提重兵以鎮撫建康又分遣大將戍守旁郡凡饋餉所須者博矣乃留掌計之臣專領供億之務有請於朝以汝為屬茲命起之廬次列於郎曹所以因爾之能而濟事功其悉乃心徃佐而長可

黃龜年除倉部員外郎制

勅具官古人有言曰雖有金城湯池帶甲百萬無粟不能守也故用兵行師饋餉為急爾早以選擢嘗贊銓衡材智之優宜膺任使載加召對敷奏可觀司庾民曹是為劇任徃修厥職嗣有褒陞可

程邁除太常少卿制

勅具官某奉常職典天地任兼禮樂凡歷代之沿革本朝之典故皆當深思而熟講之以參酌情文述作之本旨自非博習之士通於古今者孰能任之爾以儒學決科以文雅飾吏薦更劇任繼歷要塗比自螭坳復持使節宣勞於外亦既閱時茲用召還俾居秩宗之任斯為清選尚勉之哉可

陳戩太常少卿制

勅具官某昔齊仲孫湫適魯猶秉周禮知其未可動也朕當艱難之際未嘗不謹於禮故比雖裁損澀員九卿之列皆罷而太常之官獨存焉豈非隆禮而重本哉爾儒雅自將操行無玷臺僚省戶皆所踐更其貳奉常以掌郊廟朝廷禮儀之事虞舜命九官於伯夷作秩宗曰夙夜惟寅直哉維清蓋不如是不足以交神人也往祇爾職尚勉厥脩可

柳約太常少卿制

勅記有之班朝治軍泣官行法非禮威嚴不行蓋禮雖

治定而後制然治軍之間亦不可廢也朕遭時艱難講古巡狩而宗廟朝廷征伐軍旅之事凡繫於禮文者非一則率屬以任其職者可無其人哉其官某性資開敏學術深醇早勵猷為踐更臺閣比參議於軍事遽書警奏殆無虛日雖遇盤根錯節迎刃而解朕用汝嘉肆命汝進貳于奉常以司贊導朕將觀汝之材而試用之矣昔祭遵為將雖在軍旋不忘俎豆矧汝以禮為職乎往祇厥官無忝朕之命可

程邁除檢正制

勅具官中書門下機要之事給事中舍人皆為其屬然列於從官各有職守糾駁諷議莫非朝廷大務至文墨細故參酌典法督責稽違者又不可以無其人此朕設檢正以察諸房之事也爾儒學之美吏治之明有稱於時見於已試踐更中外再至九卿茲用仍其舊職處之宰屬是為高選其益懋哉可

周頴檢正制

勅具官朕循祖宗之法中書門下合而為一所以省文書而壹統類也又命設官以糾察諸房之事如古掾屬列於公府庶事大臣不勞心於細故而專意於機務之大者非夫明敏練達孰宜任此哉爾儒學之美政事之能有稱於時見於已試其由銓選之任俾贊機要之司往其欽哉毋忝休命可

綦崇禮除中書舍人制

勅西臺出令之原內史贊書之任自昔獨存於三字專號詞臣於今分押於六曹兼總吏事擇人而授得士為難宣教郎試起居郎綦某學富本元文兼體要既殫洽於聞見亦明習於憲章省戶握蘭恬而自適螭坳載筆動而必書比給札於向方俾試言於右省落筆而觀者如堵共驚倚馬之材終篇紙價頓高深得演綸之體肆揚成命進陟從班時方屬於艱難朕急圖於賢俊修飾潤色允資播告之辭獻納論思更佇盡規之益徃祇訓朕訓無怠厥修可

李釜中書舍人制

勅政事總於西臺詔令掌之內史賞罰黜陟之柄既得
 以與聞討論潤色之辭必資於行遠每難是選必得其
 人其官經術邃深文詞敏妙儒科發策早居多士之先
 選部為郎固已歷年之久比列曲臺之貳浸躋柱史之
 聯自密侍於軒墀嘗贊為於名命宜起祠廷之逸進參
 法從之華時方屬於艱難朕急圖於英俊致治以得賢
 為本當益勵於爾猷鼓衆以出命為先其不匿於朕指
 往服予訓亟修厥官可

李公彦中書舍人制

勅西臺出令之原內史贊書之任自昔獨存於三字專
 號詞臣於今分押於六曹兼總吏事擇人而授得士為
 難具官學富本元文兼體要馳聲場屋早冠上游試藝
 詞科復居前列遂預道山校讐之職復觀策府奇異之
 書滋博洽於見聞益沈涵於器業比還著位再貳奉常
 命給札於尚方俾試言於右省肆揚成命進陟近班時

方屬於艱難朕急圖於賢俊修飾潤色允資播告之辭
獻納論思更佇畫規之益往祇朕訓無怠厥修可

洪擬起居郎制

勅具官某昔孔子作春秋於隱桓之際則彰於哀定之
間則文辭雖不同然記事之文不可廢也朕惟艱難以
來史失其職而著作之庭俄空焉選述之官非左右記
注將孰任其事乎爾儒術資深議持論正橫經學省師表
克修執法臺端風節甚峻踐揚之譽文處彌高茲既御於
祥琴宜即還於朝著爾其載筆軒陛言動悉書無曠厥
官使論次者有考焉可

劉範起居舍人制

勅具官朕惟古之王者世有史官君舉必書所以慎言
行昭法式也左史既言右史記事帝王靡不同之頃自
艱難以來典籍或廢而不錄矧官弗備員將孰舉其職
乎爾學問通博質性淳厚嘗冠多士老於郎潛退處祠
庭安恬自得宜還朝序入侍螭坳爾其秉筆而書言動

悉載斯為稱職尚勉之哉可

董道徽猷閣待制與郡制

勅入持從橐出領藩符惟時爾臣宜膺異數具官某博
學而多識殫見而洽聞誦甘泉之遺儀如指諸掌記南
宮之故事不忘於心早擢秀於士林遂飛英於儒館薦
更郡寄復嘆郎潛浸陟九卿之聯廼躋二史之列遽以
疾驗丐於外遷宜升次對之班俾遂偃藩之逸往祇朕
命勿替厥修可

湯東野徽猷閣直學士知平江府制

勅分職六卿蓋重朝廷之體承流千里式隆屏翰之權
惟內外之勢既殊則名位之實必稱方膺委寄宜渙寵
章具官某器局靖深材資敏劬果藝以達得孔堂從政
之方經術而文繼漢儒飾吏之美薦更事任藹著聲猷
眷茲吳門乃爾舊治頃緣移蹕之務實繫先置之行類
川願借於寇恂西河欣迎於郭伋俾即貳卿之秩仍紆
太守之章屬議臣之有陳稽舊典而或戾謂創開於近

比非增崇於本朝宜更延閣之班專布名藩之政矧吏民素遵於條教而關梁方謹於誰何尚悉乃心益觀來效可

王循友知建康府制

控江山之都會望莫重於陪京撫民卒之浩繁治必資於良牧非聲猷之素懋曷罷寄之兼隆以爾雅亮不羣威寬有濟夙播儒紳之譽薦更省闈之華司列東銓嘗羽儀於禁路承流北固方屏翰於名邦嘉善政之流聞宜雄藩之就陟任兼留鑰爾典其嚴地有宿兵爾為之重懋乃藩宣之績體予眷倚之優可

陳邦光移知建康府制

勅朕省方侯甸移躡近邦惟置噐之未安念橐弓之無日分屯師旅控扼襟喉爰求侍從之良俾任藩宣之寄具官某謀議深博材資雋明早潤色於西臺旋鎮臨於南服比朝行在進陟貳卿輟從荷囊之近班付以朱方之巨屏惟時建業實古名都據吳會之要衝命相臣而

留撫資爾術畧修彼戎兵宜析左符就更重鎮能通世
務儒者雖樂於有為思濟時危人臣固難於擇事圖稱
朕命益既乃心可

凌唐佐升職知應天府制

勅睢陽要衝平臺都會實藝祖興王之地乃朕躬纂服
之邦爰擇守臣式隆委寄爾材猷之美風力之強將命
王畿聲績懋著其升華於延閣俾司鑰於留都爾其綏
撫疲民繕修守備思固吾圉以觀爾臣可

李邴知平江府制

勅浙部輿區蘓臺重鎮當三江五湖之會多強宗大姓
之家民俗阜蕃食貨滋殖乃眷藩垣之任必資心膂之
臣爰渙茂恩式隆委寄具官某智周而材贍學博而聞
多愷悌足以臨民忠嘉足以謀國徧儀禁路殫論思獻
納之誠入贊政塗有同寅協恭之德比辭機務均逸思
廷念王室多事之秋正大臣宣勞之日矧吳門之名郡
欲師帥之得人疇咨於朝肆以命爾朕心朕德夙惟左

右之親有社有民宜布朝廷之惠撫循良善權抑豪強尚既乃心圖稱朕命可

胡舜陟知建康府制

勅昔漢高守關中光武保河內皆深根固本以制天下朕中念中原雲擾未有旋旆之日惟建康實古帝王所宅又為仁祖興王之國符朕躬潛邸之名形勝具存亦今日之關河也付之守帥可不遴其選哉具官某智畧輻湊材資雋明事不辭難勇於為義載惟是邦乃江左要地是以命爾以二千石之重為朕守焉爾其修扞禦之備勵水陸之師以保長江天塹之險無令敵人侵軼而已勉迄爾庸圖稱朕命可

葉渙待制知鎮江府制

勅侷藩共理允資師帥之良延閣通班尤高次對之選矧方思於固守宜增重於近邦將圖爾庸肆頒朕命具官某性資爽邁風力強明薦更藩翰之符雅著循良之譽官所居而可紀材無施而不宜比輟漕權徃分郡寄

卷二
朕念朱方之巨屏實居京口之要津宜升爾朕式隆雅
望壘門曲格尚存鐵甕之高墉戰艦艘艘更講水犀之
長技往服厥事益既乃心可

陳邦先知鎮江府制

勅設官分職文昌為政事之源宣化承流刺史居吏民
之表眷予近列造造明廷宜膺東求式分委寄具官某
風猷英邁智畧深通彬彬徐幹之文纚纚馬周之論爰
早被非常之遇驟更不次之遷薦析州符屢踰歲紀逮
來朝於行在俾進陟於貳卿念當戎路之戒塗尤重朱
方之近屏地隆京口城迫江津惟武備之未修顧帥臣
之屢易與其持橐簪筆參茲侍從之班孰若繕甲治兵
固我封疆之守躋華延閣作鎮大邦允資材術之長實
出懷懷之厚佇觀來效庸稱茂思可

胡唐老知鎮江府制

勅朕省方侯甸移蹕近邦惟置噐之未安念橐弓之無
日分屯師旅控扼襟喉爰求侍從之良俾任藩宣之寄

其官某材猷敏幼識慮精深早更臺閣之華繼奉麾符
之守蕩平逋寇薦奏膚功遂進陟於近班仍易臨於重
鎮屬樞臣之將命顧幕府之須材載念朱方夙稱京口
適嚴武備已駐大將之鼓旗遘東帥臣俾總連城之節
制允繫術畧協濟事功尚悉乃心圖稱朕命

湯東野除待制依舊知平江府制

勅朕躬履至尊遭時多故師徒沸擾宮圍震驚非賴股
肱心膂之臣與夫藩垣屏翰之寄提兵入衛扶義抗章
孰能協濟而戡斯難哉具官某夙蘊智謀素懷節義使
華將命風力著聞郡國承流教條孚信比屬勤王之舉
載嘉宣力之勞盡瘁赴功竭忠衛社宜進從班於延閣
復仍舊治於蘇臺用昭慶典之行聿為有功之勸可

李貴遥郡刺史制

勅具官朕命樞筦之臣提兵扞敵軍功爵賞皆決於外
不從中御也刻章來上謂爾嘗有戰多之績而恩典未
稱是用命爾以遥刺之秩以為懋功之勸朕惟爾方執

干戈備戎行而強敵之侵暴故也是汝歷功名取富貴之日也疇昔之勞賞既厚矣方來之效爾其圖之可

薛慶武功大夫忠州刺史制

勅上郵之地素號繁庶比經外敵民物凋殘而吏或拘於文法不能為戰守之方爾乃糾率兵民繕修備禦措畫有緒忠義可嘉其峻陟於武階仍遙分於郡刺併以命爾是為優恩尚冀乃心益圖來效可

劉洪道知明州制

勅朕惟四明奧區西限重江東淹左海在承平之時號為無事比因外敵馮陵移蹕於此事叢人衆供億蕭然非有文武智術者不足以勝守臣之職也具官躬應務之材懷御衆之畧頃守東秦屢推強敵提兵遠涉紀律甚明山濤暗合孫吳之言充國習知夷虜之事今干戈未定州縣多虞爾其式遏寇虐惠綏黎元固城守明斥堠以制勝於未形則所賴以為安者非特爾一邦而已可不勉哉

程邁集英殿修撰知福州制

勅其官福在東南為一都會俗兼甌粵之舊地有山谿之險師帥之任豈不慎選哉爾以儒術之美政事之材中外踐更譽處休顯比持使節往按列城宜躋論譔之華資俾任藩宣之重寄外敵侵迫南土震驚其修扞禦之方布撫綏之政庶臻嘉靖式寬顧憂可

權邦彥起復依舊知江州制

勅移孝為忠乃盡人臣之節斷息以義蓋先戎事之憂我圖共理之良式舉奪情之典其官材為世用仕以學優智名得之勇功文章兼其武備早更華序旋鎮邊陲既委資以造朝實毀家而殉家方賴干城之略遽興陟謁之悲朕惟墨以臨戎晉侯能達禮之變經而從政閔子得事之宜宜俾節仰於苴麻亟親臨於金革允資千里之寄靡待十旬之淹王事不以家辭魯史著為明訓長吏難以憂去漢法載其舊章勉迄爾庸思稱朕命可

曲端知渭州制

勅陝右與區平涼古郡統制夷落表裏關河宜得爪牙
之臣往任藩垣之寄具官材資宏毅智略深沈學通玉
帳之竒氣稟金方之勁早共武夫屢積戰功比統率於
西師以緝綏於陝服朕念關中之險固實為天下之本
根士馬精強歌謠慷慨稍失藩籬之守半為虵豕之場
宜糾合於隣邦力恢復於列郡自頃連帥之職靡親行
陣之臨方時多虞豈遑自逸凡今警急之報尚何文法
之拘援桴鼓以徂征冀犬羊之知畏永清全雍以濟我
師其益勵於壯猷用欽承於遠御可

趙令歲起復黃州制

勅具官列城共理國之藩垣要經從宜理有權變方遭
時之右武斯以義而斷息爾頃執親喪乃辭王事顧黃
陂之支郡亦淮右之要津欲杆侵凌當圖備豫宜服晉
侯之墨往分漢守之符勉修厥官思固吾圉可

又直龍圖依前知黃州制

勅具官昔唐天寶之際張巡許遠守睢陽身隕而名傳

薛愿守淮陽城全而事不顯杜牧乃有良臣不如忠臣
 之論頃自擾攘以來敵國內侵寇盜充斥二千石能保
 其城郭者鮮矣爾以宗室子任符竹之寄忠勇自奮備
 禦有方身被重傷誓以固守保全城壘民賴以安乃俾
 進直河圖以為爾寵所以良臣也尚勉之哉聿觀後效
 可

晁公為直祕閣知台州刺

勅朕惟東粵之攘民物康阜凡在守臣尤加遴擇爾雍
 容文雅譽處甚休進直中祕之嚴往蒞名邦之寄有民
 有社尚勉之哉可

謝客家徽猷閣學士知泉州制

勅設官分職文昌為政事之原宣化承流刺史乃吏民
 之表匪時賢德曷稱選掄具官造道深醇秉心端亮既
 孜孜而奉國每倦倦而納忠上庠居師儒之官西省聯
 諫諍之列遂徧更於華要旋出殿於藩垣台自南邦進
 躋八座方資辰告乃以疾辭升延閣之崇資鎮溫陵之

巨屏宣揚惠澤撫字遠民尚既爾心圖稱朕命可

宋彥通待制知筠州制

勅承平之世朝廷尊榮人樂任進則所重在内多事之日州郡間暇人思遠去則所重在外昔人或起登仙之羨或恨得地之晚也其官材資敏達識慮精深列職郎曹聲猷克茂司刑卿寺讞議惟明奉使節而出疆屬戎車之在境能達國命式適其歸俾乃延閣之班往蒞一邦之寄爾其布宣惠澤撫字遠民無以暇逸自居是為稱職可

李鄴待制知越州制

勅上詞具官材猷敏達識慮精深素懷忠義之心習知

邊鄙之事宣和之季亭候弛嚴方萬騎之濟河以單車而出境未明信誓復應詔音慨然請行載馳使傳能達國命式適其歸俾乃延閣之班往蒞大邦之寄廣宣惠澤鎮撫列城無以暇逸自居是為稱職可

商守拙知筠州制

勅次對西清持從臣之橐承流列郡分刺史之符爰眷
賢勞肆頌朕命具官提身無咎秉德有常既砥礪於材
猷亦明習於文法比繇廷尉進貳秋官屬就領於真祠
俾刊修於挈令力祈外補蓋亦重違其綰郡章俾從爾
志宜布朝廷之惠往安閭里之民可

許中知桂州制

勅具官桂林大邦湘南都會師帥之任尤難其人爾博
涉藝文通達吏治校讎儒館多所見聞踐歷郎曹已稱
疆敏茲承流於江表乃聞問於朝廷其升延閣之華資
俾鎮南荒之巨屏自昔夷獠之俗每患於難安惟時方
面之臣必先於無擾服我明往其欽哉可

林適待制知福州制

勅東甌故區福唐都會旁連百粵兼總七閩在治安之
時鎮臨為重當擾攘之際撫馭尤難宜擇近臣往分委
寄具官才猷通敏學術淹諳以文章成名居多傑思用
儒雅飾吏藹著能聲比殫潤色之勞願就詞廷之選朕

念南方之巨屏薦更赤子之弄兵溪山阻深民俗慄悍
思得賢守安而治之惟爾久在里閭身習知其情偽嘗
持使節下亦服其教條宜剖符往諭朕旨尚圖來效庸
稱朕息可

柳約直龍圖閣知吉州制

勅朕惟吳越之壤民物阜蕃凡在守臣尤加遴選爾儒
學吏能見稱於世踐更臺省貳于奉常乃俾進河圖付
以郡寄朕擇人共理之意厚矣其茂承之可

范致虛知鼎州制

勅朕惟式遏寇虐康濟艱難當饋興嗟豈必借賢於異
代若古有訓亦惟圖任於舊人眷茲師帥重權宜畀廟
堂夙望爾智博而材贍文麗而學優守節不渝嘗聞汲
黯之好直因時或異遂見徐公之有常協贊機衡斯謀
必告薦臨方面靡勞弗宣茲趣召於遐陬俾來朝於行
在德與年而彌卽志雖窮而益堅還秘殿之華資以彰
體貌領殊廷之館御庸便咨詢廼慷慨以有陳願馳驅

而自效惟荆楚之興壤實夷獠之與鄰方賴老成重煩
煩鎮撫杜詩在外乃心不忘乎朝廷申伯于蕃王室允
資其屏翰往祇朕命尚遠乃猷可
李奎待制知筠州制
勅次對西清持從臣之橐承流列郡分刺史之符諒匪
時髦曷膺寵數具官文兼體要學富本原早居多士之
先寢為當世之用惟踐敷而滋久顧譽處以彌休比擢
置於西垣俾典司於外制而乃固形辭避至於再三其
班延閣之華往蒞名邦之寄宣揚惠澤撫字遠民尚悉
乃心圖稱朕命可

李陵復待制知温州制

勅朕惟東之壤民物阜康凡在守臣尤加遴擇具官文
辭典麗經術深醇早奮勵於材猷久踐更於臺閣守官
柱史夙推載筆之辭書命掖垣深得代言之體眷永嘉
之夫却實負海之名邦時屬多虞允為寄重宜還次對
之秩往奉藩宣之行爾其杆禦侵凌消弭盜賊俾爾四

封之內自臻比屋之安尚悉乃心圖稱朕命可

董道知信州制

勅次對西清持從臣之橐承流列郡分制史之符諒匪時髦孰膺寵數具官材猷博敏學問淹談出典藩垣惠昭民譽入更省寺望著朝端宜陟近班俾膺郡寄徃繼循良之治廣宣德意之孚可

連南夫知饒州制

勅名藩巨鎮在全盛之日並列於方維通邑大郡自艱難以來半罹於兵革凡茲易地而處必曰度時之宜靡有輕重式均委寄具官風猷凝粹學術深醇早擢殊科遂躋儒館逮專對於絕域旋聯華於從班出守淮邦閭里有安居之適奉迎戎輅儲峙無告乏之憂載念爾勞易臨便郡朕惟黃霸之治稱於潁川公綽之材優於趙魏徃祗休命益究爾能可

劉洪道知楚州制

勅朕惟敵國內侵兵無寧歲寇攘競擾民靡奠居念齊

魯之邦已志罹於塗炭惟淮楚之壤當益固於藩籬爰
得能臣俾膺郡寄具官猷為敏達學術詳明早踐儒林
寢躋郎選向結倚廬之戚適當戎事之興乃析左符俾
守爾土智足摧夫強敵材堪制夫勁兵方屬盛秋就分
近屏眷茲望都俯控長川是謂可為之時矧曰必爭之
地淮甸既倚之為輕重江吳亦視之以安危尚悉乃心
思固吾圍可

張汝舟除直顯謨閣依舊知明州制

勅具官國家肇建延閣以奉祖宗謨訓翬飛跂翼列於
西清乃俾搢紳之士寓直其間以為儒者之高選部使
者二千石有治理効輒畀以美名所以示勸也爾儒學
吏事有稱於時頃臺僚出分符竹鄞江之政亦及暮年
治行有聞辦事不擾進躋華職用獎爾勞增秩賜金無
愧於古盍思報稱尚勉之哉可

大隱集卷二

欽定四庫全書

大隱集卷三

宋 李正民 撰

制

劉珏權知三省樞密院使制

勅朕遭時艱難法古巡狩念長樂六宮之衆必安處於
 善邦惟百司庶府之繁難久稽於常務思講變通之策
 預圖忽耿之幾欲寄朝綱式資時傑具官性資忠厚識
 度詳明行已過乎古人言有補於當世徧更兩省殫獻

可替否之忠進總三銓著激濁揚清之譽朕惟江表之
寄實均廊廟之權思得老成共釐邦采矧踐揚於臺閣
仍久習於憲章特陞祕殿之華資俾視政塗之寵數載
隆衆望允出朕懷奉東朝之尊宜益嚴於羽衛總行臺
之政當躬治於文書時乃之休寬予憂顧可

滕康權知三省樞密院制

敕上詞同具官材堪大受學富多聞厚德足以鎮浮懿文

足以華國編儀禁路殫獻可替否之忠入贊樞庭有厭
難折衝之畧比分江表之寄共持廊廟之權念久服於
股肱實備昭於悃幅載隆柄任允出朕懷奉東朝之尊
宜益嚴於羽衛總行臺之政當躬治於文書時乃之休
寬予憂顧可

張守簽書樞密院制

勅天下之兵至衆操柄必在於朝廷堂上之奇無窮勝
算莫先於樽俎朕紹承全緒思濟多艱念匈奴之日驕
歎得臣之猶在爰圖髦傑入贊樞機具官靖深而能謀

端方而不撓智足以知當世之取舍學足以造古人之淵源久總臺綱實參國論遠矣君子之慮利哉仁人之言磨涅不能磷緇剛柔無所吐茹屬樞廷之虛位眷詞禁之得賢與言因筆墨以成文發予號令曷若運帷幄以決勝修我戎兵特躋祕殿之名兼峻文階之序進聯宥密協濟事功噫上兵伐謀靡待干戈之用真儒無敵允資德義之修尚遠乃猷圖稱朕命可

陳思恭轉遥郡團練使制

勅具官固官司勲之職凡賞無常輕重眎功朕於勤王之賞已加厚矣其有拘於彛制而未盡者豈所以示勸哉爾見義敢為臨機必斷移檄以令近郡率師而當戎行已進陟於武階仍遥陞於郡寄益殫忠蓋圖報恩榮可

俞詹遥郡團練使制

勅具官出納之吝謂之有司然必得其人乃可以舉職也以爾材力掌吾外府之事而究心夙夜克修厥官會

課當遷既有常法俾尚仍於舊貫特升秩於州團益勵爾為圖稱朕命可

劉鍾贈團練使制

勅殉義忘生乃見忠臣之節捐軀扞敵宜膺國典之褒具官早服戎行克宣勇力冒鋒鏑而弗顧履行陳以無前勢既屈于豺狼身遂膏于原野載嘉爾烈深厯朕懷特陞左武之階仍領遙團之寄庶幾英爽尚克欽承可

胡舜陟水軍措置使制

勅肄習舟師屢更使任未見久長之策已當危急之秋宜得其人俾司厥事具官材猷敏給識慮精深振職臺端風采行於百辟承流方面威望著於列城三載服勞羣盜屏迹比覽奏封之來上深嘉論議之堅明更畀使權旋頒召節載念戈船之利實防天塹之津謂爾智之有餘驗爾能於已試歷選在服莫如汝諧仍延閣之近班總水犀之長技徃祗朕命益究乃心可

王羲叔水軍措置副使制

勅朕式遏寇虐經營四方少安警蹕之行周覽江山之
勝俾修守備當擇其人具官識慮精深猷為敏達著君
卿行能之美實山東禮義之家早歷卽曹遂躋禁從久
辭著位退處燕間朕肄習舟師屢更使任未見久長之
策已當危急之秋歷選於朝肆以命爾總水犀之節制
扞天塹之要津其旣乃心亟圖厥事可

杜充宣撫使制

勅安強成道德之威莫先於正本折衝在精神之運猶
貴於擇人朕遭時艱難法古巡狩暫駐江左式遏寇攘
方倚用於耆英徃控臨於淮甸宜正使名之重以光閫
寄之雄具官莊重而淵深剛方而宏毅厚德有鎮時之
望沉謀燭先事之機比守兩都盡消羣盜吳漢隱若敵
國民賴以安李勣賢於長城寇莫能犯輟司留鑰入贊
籌帷逮來對於便朝實副懷於虛佇人皆欣見其風采
朕亦深挹其謀謨茲屬盛秋當嚴武備仍總樞機之柄
亟驅徒御之行增重使權益隆節制式符衆望庸示眷

懷噫光弼之號令一新旌旗改色萬福之威聲夙著草木知名往勵壯猷圖稱休命可

宋輝直龍圖閣發運使制

勅決勝千里允資帷幄之謀宣力四方必賴股肱之助眷予樞輔總國兵機思遠振於軍容俾暫將於使指具官中正不撓宏毅敢為卻穀既說於詩書翁歸兼備於文武單車出使屢通鄰國之情十乘前驅實仗元戎之畧既克平於逋寇益增重於威名遂躋常伯之聯進陟中樞之峻朕念江漢上游之地是為荆楚四戰之郊宜秉輶傳以按臨悉總連城之節制擊楫而濟祖述奮威於中原抵几以行公瑾收勲於赤壁聿臻綏靖式佇旋歸可

宋輝直龍圖閣發運副使制

勅朕惟江淮六路財賦之淵毅而發運使副實總治之自外敵馮陵移駐江左仰給調度視平日為多而懋遷有無於一時為急欲任厥事可不惟其人哉爾材力強

敏心計精明事不辭難所臨必最舳艫應募則千艘畢
集轉輸浮海則萬斛安濟已試之效卓然可觀是用命
爾進直河圖以總東南之漕計爾其究心乃事濟時多
艱益著爾勞思稱朕命可

李承造兩浙轉運使制

勅朕惟吳越之壤民物阜康惟茲戎輅巡幸之時尤重
外臺轉漕之寄爾才資明敏智畧周通比由宰士之聯
徃涖名城之守可

成大亨直祕閣兩浙轉運使制

勅具官外臺轉漕之權漕部富實之境衣冠避地流寓
為多警蹕者方仰給者衆孰膺遴選宜得能臣爾早涉
藝文尤通吏治久服勞於州縣既擢位於郎曹譽處彌
休安恬自得俾直圖書之府徃臨吳越之區非威望不
足以厭服姦萌非清裁不足以表率羣吏貢賦無追科
之擾關梁有捍禦之方徃體訓言是為稱職可

獲恪廣東轉運使制

勅朕惟五嶺之南去朝廷遠甚官多假版吏緣為姦思得忠信之臣往將使指爾材猷明敏列職即曹服采惟勤聞譽休顯持節南粵宜為朕行使民情上聞惠澤下究斯為稱職尚勉之哉可

姜仲謙起復湖北轉運使制

勅人子執親之喪三年不從政然金革之事無避也朕屬時艱難思與四方之士共圖康功可不變禮以從宜哉爾風力強明材猷敏濟薦更使指咸以能聞比以苴哀乃辭王事朕惟荆湖之沃壤實連江漢之上游控扼輸將於今為重宜起倚廬之戚往持轉漕之權其既乃心亟圖厥事可

上官悛除直祕閣京畿運副使制

勅具官昔榮夷公好專利而王悅之芮良夫知王室之將卑以為王人者導利而布之上下者也而或專之其害多矣朕念掌財計之臣務以聚斂趣辦或者取羨餘以市恩其能捐橫歛恤民隱為朝廷布仁義之澤者絕

希爾將漕王畿論事有體乃能奉朕寬恤元元之意丐
罷苛擾刻剝之令於用度殫屈之時朕甚嘉之其升延
閣之班仍正使名之重將以風厲四方使刻削之風丕
變而吾凋瘵之民庶乎少休息矣清資顯秩於爾何愛
焉可

張徵知江州充江南東路制置使制

勅潯陽古郡據上流之地在東晉時號為重鎮非宿望
大臣不以居之朕今時巡江左式遏寇攘繕甲治兵以
張軍勢匪我舊輔孰付帥權具官風格方嚴器宇渾厚
代言西掖潤色居多執憲中司糾彈甚峻逮茲南渡進
總右綱方賴協恭之誠遽陳均逸之請朕命四鄰之舊
任重股肱矧茲多難之辰憂深屏翰爰分符竹之寄俾
捍江湖之衝加畀使名庸示眷倚欽予時命益勵遠猷
可

中大夫起居舍人趙綸除右文殿脩撰知慶元

府兼沿海制置副使制

千里曰畿莫重甬東之鎮八命作牧爰咨螭右之英論
傳通班藩宣示寵具官某才猷闕碩德望峻清正直靖
共確乎有守進退出處付之無心自疇庸於外臺肆陟
明於武監易冠正色糾察官邪鯁論犯顏維持國是身
方居於要劇志每尚於清高侍立記言引之自近直前
奏事深所願聞厥今四明視漢三輔惟制閫有營壘甲
兵之衆惟相卿有衣冠闕閱之多乃睠老成是資鎮撫
德威遠暨自令瀚海之無波聲迹相聞尚冀京師之蒙
福式稱予選益懋爾庸可

劉文舜防禦使制

勅朕遇寇虐以綏疲瘵之民厚爵賞以勸忠勤之士覽
竒功之來上宜異等以疏恩具官久踐戎行克恭武服
屢底戰多之最薦膺懋賞之褒威名既立于淮邦績效
未書於盟府爰正有司之誤載酬馬柵之功增重使名
用昭禦侮徃祇朕命益勵爾庸可

喬仲福左大夫遙郡防禦使制

勅朕躬履至尊遭時多故孽臣騷擾反易天常實賴熊
羆之士不二心之臣糾合戮力克清大憝肆頒國典用
答殊功具官拳勇有聞忠誠自許薦更武服屢奏膚功
比屬勤王之行實嘉宣力之著躬率虎士先驅顏行宜
仍左武之班進領禦戎之寄茲為異數益勵壯猷可

王罕贈觀察使制

勅狗義忘生乃見忠臣之節捐軀扞敵宜膺國典之褒
具官某久服周行克宣武力頃總戎於畿右適遇敵於
淮西授兵登陴既勵三軍之氣蒙楯負羽孰當強虜之
鋒孤堅不支摧陷以歿載嘉爾烈深盡朕懷俾遙領於
廣車仍就升於顯秩併隆恩典用慰存亡想爾冥靈欽
予休命可

賈謹換觀察使制

勅君臣之義險夷當秉一心立國之方文武固無二道
適圖守備宜越常規具官某風力強明材猷敏劭早聯
儒服亟踐周行浸躋華近之班屢典劇繁之寄比繇廬

次昇以使權扞天塹之要津總水犀之節制輟以從橐
易處廉車其躬屬於戎韃以總臨於戰艦往祇朕命益
既乃心可

奉聖旨內侍鄭謨恬退自守不妄干進特除和

州觀察使制

昔者先王以德詔爵以為兩者皆天下之達尊必惟其
人而後稱君唯曰天命臣唯曰德賞則上下不敢以輕
而民服具官某恬於勢利不妄進取夫以左右近習之
臣而有廉節自喜之行固朕之所嘉予也陟汝廉車以
勸在位使汝德稱其服而人浮於食也不亦於汝安乎
可

皇兄沂州防禦使權主奉吳王祭祀多才磨勘
轉明州觀察使制

勅朕崇長宗支以綿帝繫高爵厚祿宜與共之而猶計
歲課勞循次而進所以昭至公謹成憲也具官某信厚
以為質靖共以自將入不恃家人之恩而出無違闕庭

之禮况以尊屬於今斃人則徑陟廉車云誰不可而必
中有司之度積十年然後進之豈朕有所愛哉然而身
無吏事之責秩比法從之崇其視匪躬盡瘁沒齒下僚
者又何其幸也宜對殊渥無忝所生可

王忠嗣復舊官仍兼隴右節度副使制

勅隴右破吐蕃跳盪功專知節度行軍兵馬使游擊將
軍守右威衛翊府左中郎將賜紫金魚袋王忠嗣出自
將門習於軍政智謀足用材藝超倫頃在河隴備彰城
節持兵所向料敵無遺挫其侵軼之師收其要害之地
念功斯在議賞攸歸宜復舊官置同正員仍充隴右節
度副使依前專知兵馬先有勳封並宜如故

授馬元慶河西節度副使制

勅雲麾將軍右驍衛將軍員外置同正員幽州節度副
使上柱國馬元慶名重武臣才優將畧有剛勇以制敵
能廉幹而成務河湟作鎮寇敵是虞既資攻守之術宜
佐軍州之任可充河西節度副使判涼州長史兼赤水

軍副使仍都知兵馬使餘如故

林希道李全特追復彰化保康軍節度使開府儀同三司京東路鎮撫使依舊京東忠義諸軍都統制

勅記功忘過君無終怒其臣立身揚名子欲致孝者父受狗肯堂之請聿新告墓之榮猶有鬼神式時猷訓故具官某材稱英傑識造高明憤時因衆怒以激昂提師決大義而去就涵養念累朝之賜杖策來歸間闕竭百戰之勞納刀自奮萬人呼而槍急兩河闢而璽來授鉞登壇已視衮圭之貴書常作冊不昭燹鼎之勲俄躋跋以失常悵幽明之遽隔猛知正朔想垂歿以有言陵豈孤恩嘆自明之無益賴有傳家之慶能殫報國之忠昨土分封既受功臣之誓奉先思考必蓋前人之愆憫其至情還以舊物仍改春秋之史式慰霜露之心爾其寵服塗芝報圖結草可

周離享直秘閣轉運判官制

勅具官朕惟仁祖時尤重東南漕路漕運之職乃命施
昌言許元為之使又命馬遵為判官三人者其才足以
相濟能叶於厥賦是時人不告勞而財賦充足朕甚嘉
之以爾學問甚富材力有餘早踐郎曹嘗升柱史比列
地官之屬允資心計之良宜直秘嚴徃圖邦用能通世
務儒者雖樂於有為思濟時危人臣固難於擇事佇觀
成效無愧前修可

董道贈官制

勅朕待遇臣工務全終始遽起淪亡之嘆可無褒贈之
恩具官早負時名亟躋儒館嗜學至老而不厭所聞既
博而愈精未嘗枉道以徇人故每進寸而退尺晚既言
於柱史浸聯華於從班方俾分符俄聞易簣宜優加於
恤典仍峻陞於文階庸示盡傷併推餘澤尚其靈爽歆
此寵休可

徐處仁贈官制

勅秉鈞當軸嘗宣力於邦家隱卒崇終宜疏恩於泉壤

乃眷我朝之舊弼未膺身後之餘榮厥有典常式隆著位具官忠厚廉正靖深簡夷學造古人之方材周當世之務徧儀禁路兼嚴樂侍從之能屢典藩符擅龔黃政事之美靖康有作寇難方滋首擢冠於槐衡遂再安於龜鼎總領衆職已聞魏相之有聲鎮撫四夷方賴陳平之多智懇辭魁柄退處祠庭遽興愁遺之悲莫逮親臨之禮爾孤有請令德未忘升特進之崇階示褒賢之異數庶絕英爽尚克歆承可

沈思贈官制

勅朕待遇臣鄰務全終始遽起淪亡之嘆可無憫惻之恩具官夙勵材猷浸躋華近代言西掖早殫潤色之勞均逸琳宮自得燕間之適稍淹歲序未究設施顧浙川之弗咎嗟易篲之何及宜加卹典厥有彝章俾超進於文階用增光於幽竅靈而未泯尚克歆承可

魏憲贈父制

勅朕躬執珪幣祇見郊丘逮釐事之告成肆湛恩之溥

及眷予近列宜有寵章廼推本於所親用追榮於先世
具官父某躬懷德義性服典常沉於下僚未究遠業丕
顯子孫之餘慶遂為富貴之大家服在邇臣實汝賢嗣
薦舉褒揚之典已躋通顯之班屬禋祀之肇修乃弟昆
之有請載遷峻秩用賁幽局尚想冥靈欽承休命可

贈母制

勅朕躬執珪幣祇見郊丘逮釐事之告成肆湛恩之溥
及眷予近列宜有寵章廼推本於所親用追榮其先世
具官母某氏秉心淑慎迪德溫恭宜其家人克昌厥後
丕顯子孫之餘慶遂為富貴之大家服在邇僚實汝賢
嗣薦舉褒揚之典已膺休顯之稱禋祀肇修弟昆有請
載錫小君之號俾開名郡之封尚想冥靈欽承休命可

封妻制

勅朕纂紹丕圖欲修禋祀舉三歲之大典以初為常施
四海之湛恩無遠弗屆眷予近列宜有寵章肆推家室
之榮以示閨門之慶具官妻某氏溫恭淑慎柔閒靜專

生於名門來嬪令族輔佐君子克勤厥家早開石窀之
封已侈綸衣之貴載疏國典式示朕恩徃修中饋之恭
更勸南山之義欽予時命永建乃家可

鄭樞密封贈曾祖制

勅古者公卿大夫皆有廟以祀其先而視名位之高下
為多寡今朕推褒崇之典以觀在列亦因爵秩之隆殺
以差遠近惟執政大臣廼得追榮其三世則待遇之禮
亦云厚矣具官曾祖積德累行悔於邱園流澤之長鍾
於後裔贊我樞府惟爾曾孫遭時艱難能任重大茲屬
延登之始宜疏休顯之恩超進文階以為爾寵靈而有
識尚鑒之哉可

贈曾祖母制

勅婦人正位乎內有全德懿行之美無以自表暴於世
惟其宗族之盛子孫之賢有聞於時浸以昌大維乃祖
乃父積累之慶抑其內德之茂益有助焉具官某曾祖
母某氏柔閒靜專克配君子宜其家室胥及逸勤流澤

之長克昌厥後贊我樞府惟爾曾孫遭時艱難能任重
大茲屬延登之始啟以大邦之封靈而有知尚克歆享
可

贈祖制

勅傳稱商俗尚神說者或讒焉然盤庚之遷都告其羣
臣以災祥禍福之降未嘗不以乃祖乃父為言則廟祀
之禮褒封之典歷世修而兼用之豈特為虛文而已哉
具官祖某潛德弗耀積善彌彰行義之修稱於鄉黨厥
躬弗有施及後昆惟爾賢孫贊我樞府茲屬延登之始
併疏褒顯之恩超進文階用光寔靈而有識尚克欽
承可

贈祖母制

勅自秦漢以來婦人或裂卽縣以稱君湯沐之奉與列
侯比近歲分八等之封以易郡邑之號雖曰彌文益亦
美稱也以為閨門之寵文實兼古今之令典具官祖母
某氏溫恭淑慎宜其家人婦德之良稱於宗黨厥躬弗

有施及後昆惟爾賢孫贊我樞府茲屬延登之始併疏
褒顯之恩啟封大邦用光窀穸靈而有識尚克欽承可
勅古者子為大夫父為士則祭以大夫而服以士服蓋
不敢以子之貴而加於父也今之士族子貴且顯矣父
之爵秩或弗至焉則非所以慰其心此朕推褒封之典
以及其先有不宜緩者也具官父某躬秉德義性服典
常流澤之深施於後裔惟爾賢子贊我樞庭禦侮折衝
方資廟筭顯親報德式稱孝思超進宮師以錫爾寵丕
昭有後之慶蔚為窀穸之光冥漠有知尚其歆享可

贈母制

勅人子之於親雖三牲之養未足以為孝惟立身行道
揚名於後世以顯父母於是為至然自彤管女史之職
廢而純德懿行之美不傳於時惟觀其子之賢世昌以
大則母之德可知矣是可無褒顯之恩哉具官母某氏
溫恭淑慎克勤厥家輔佐嚴君乃有賢子贊我樞府為

時名臣爰於試用之初併舉疏封之典俾開名即加賁重泉冥漠有知尚其歆享可

封妻制

勅夫貴於朝妻榮於室古之義也然執政大臣方盡瘁於國事而家事有弗及知焉矧當艱難之時類皆以一身從朕於干戈之際則壺內之寄必有賢德之助可無褒異之典哉具官妻某氏柔惠溫良克佐君子贊我樞府為時名臣爰於登用之初併舉疏封之典乃啟大即以爲爾榮尚祇服於寵光益克羞於饋祀可

王參政贈曾祖制

勅朕惟王氏遠有譜系而望出太原瑯琊者遂獨盛於天下自秦漢以來世為將相大家淮水之占尤盛於東晉逮我國朝凡元功宿將多其苗裔雖受姓名或不同然其源流之盛遠矣具官曾祖秦國正懿之孫鄭國恭肅之子鍾英令族為時聞人質儉自將弗流於驕侈剛介特立靡惰於燕閒垂訓義方乃有賢子名繼登於

科甲已安享於壽康雖躋環衛之官未究清芬之選參
吾大政實爾曾孫爰於登用之初誕舉褒崇之典正位
宮保光賁泉扃以彰積善之家以示君子之澤庶絕英
爽服此寵休可

贈曾祖母制

勅朕惟唐室之制宰輔封贈不過其父故權德輿自東
都改葬其先始求贈祖以五品之秩亦未嘗極保傳之
位也國朝加禮大臣務隆恩典名器之大必上及於三
世綸翟之貴亦光施於有家待遇之意可謂厚矣具官
曾祖母某氏柔閒靜專溫恭淑慎生於貴族來嬪大家
風行閨壺之間惠浹宗姻之黨乃生賢子子又有孫為
吾政事之臣事朕艱難之日國方圖於協濟爾宜極於
褒榮特開名郡之封載錫小君之號庶絕冥漠服此寵
休可

贈祖制

勅昔漢世祖中興不以功臣任事故高秩厚禮允答元

功峻文深憲責成吏職於是鄧禹教授諸子各守一藝
賈復之徒並標甲兵崇儒學然後守成之業茂焉國朝
修文偃武元功宿將皆教子孫以詩書而鴻儒碩學之
士接武於朝者衆矣矧其流澤之長世昌以大是可無
褒異之恩哉具官祖承勳門之後蹈儒者之風下帷潛
心講誦大業躬稟義方之訓顯登甲乙之科受知公卿
宜居館閣黃香博士之舉當接武於俊遊祁奚內舉之
親終引嫌而補外屈臨別乘旋剖左符弗有於身慶鍾
厥後參吾大政實爾聞孫爰於登用之初誕舉褒崇之
典東宮三火位極顯榮聿為電窆之光丕顯子孫之慶
靈而有識尚或欽承可

贈祖母皇甫氏制

勅婦人正位乎內雖有全德懿行之美無自表暴於世
惟觀其子孫之賢浸以昌大雖乃祖父積累之慶而內
德之茂盖有助焉具官祖母某氏秉柔懿之姿躬婉婉
之行生於貴族來嬪大家有士而良服采朝列流澤浸

遠積善彌彰惟爾賢孫參吾大政國方資於協濟爾宜
極於褒榮俾開名卽之封載錫小君之號靈而有識尚
或欽承可

贈祖母韓氏制

勅上詞具官祖母某氏秉柔懿之姿躬婉婉之行生於

貴族來嬪大家被賢王訓育之恩著婦德慈祥之譽均
一之美既顯饋祀之職惟恭克勤厥家以相君子流澤

浸遠積善彌彰下詞

贈祖母來氏制

勅上詞具官祖母某氏躬淑慎之姿服組紉之事克婉

君子勤於厥家裴秀之譽早聞王符之書既顯訓於賢
息罔有逸言未開石窳之封每結寒泉之念躋華近列
惟爾有孫早推天支就傳之恩允愜前人追封之志始
頒恩典未極褒崇茲進服於政塗方參毗於國論乃即
登延之始併推加贈之文升榮號於小君啟新封於名
郡靈而有識尚克欽承可

贈父制

勅昔漢張湯杜周並起文墨小吏致位三公皆有賢子
德器自過繼踵將相遂為世家史臣乃謂元功儒林之
後莫之能及然自我國家奄有區夏宗工名臣軒冕相
承大抵皆元功儒林之後豈遽不及文墨吏哉具官父
某嗜學弗厭執德不回仲舒究天人之原晁錯明國家
之體雖沉英於州縣乃馳譽於朝廷嘗被名卿之薦論
莫遂謹言之訪對厥躬弗有施及後人以文學嗣其家
聲以材德進為時輔參預大政康濟多艱爰於登用之
初誕舉褒封之典式揚先德進位宮師以彰積善之符
以顯儒家之慶英靈未氓休命其承可

贈母制

勅古者君子之仕也三釜及親則足以樂至於千鍾弗
洎則其心悲蓋父母之德欲報罔極已則富貴而親弗
逮焉此人情之所甚戚也宜有褒崇之恩以慰霜露之
感具官母某氏秉賢淑之姿躬婉婉之行動不違於矩

矧性自樂於組紉生於名門來嬪甲族愛子益嚴於慈
訓趨庭弗假於義方是徵令息之賢早著上庠之譽徧
儀禁路為時名臣參華政事之聯實朕股肱之輔登用
慈始恩典併加式彰聖善之規特錫小君之號啟封名
卽增賁重泉尚想冥靈欽承休命可

贈故妻制

勅邦君之妻各因其國而稱曰夫人古也未嘗裂卽縣
以表之自秦漢以來湯沐之奉與列侯比至於金印紫
綬文軒丹轂顯於當世蓋所以寵勸臣下者如此雖曰
彌文亦不可廢也朕兼歷代之制以修褒封之典則燕
及其私庭者顧不厚哉具官妻某氏溫恭淑慎嚴格靜
專克勤厥家以相夫子降年不永弗逮顯榮宜疏名卽
之封載錫小君之號副之鈿軸賁於泉扃尚想冥靈欽
予休命可

封妻制

勅朕嘗觀召南之化始於諸侯大夫之妻修德循禮不

失法度其效見於人倫既正朝廷既治夫形於國者如此則施諸家者其勤亦至矣今吾政事之臣修身齊家以致祿位則盥饋在中必有其助是可無褒顯之恩哉具官妻某氏柔明淑懿婉婉靜莊生於名門來嬪令族輔相君子為時良臣參華樞務之聯實朕股肱之佐方亟圖於王事靡暇及於私家壺則具修繫爾內助載錫小君之號俾開名卽之封永保寵榮稱予休命可

劉棐復官制

勅具官數赦者古人之德宥罪者君子之仁朕臨御以來殊恩屢下矧方隆於卽寄宜一洗於刑書爾頃坐愆違法當褫秩既薦更於肆青盍悉復於故官尚謹厥修勿以為幸可

蘭整復官制

勅朕祇見圓卽肆頒大賚赦過宥罪咸與惟新施惠行仁無遠弗屆矧方共於武服宜一洗於丹書具官久歷邊陲屢膺任使頃上太原之奏有虧石建之恭降領廉

車已更霈澤其復使名之舊以昭慶典之行徃服恩榮
益思祇慎可

李釜轉官致仕制

勅告老而閔煩若古之明訓以疾而謝事近代之通規
眷予邇臣宜加恩典具官名生於實行顧於言早冠儒
科浸階膺仕馮唐潛於卽序仲舒老於膠西比疇夙望
之孚擢掌贊書之重乃陳疾疚願丐麾符方躋次對之
班遽上退休之請勉從爾志叙進文階式寵其歸徃欽

朕命可

曹昱轉官致仕制

勅告老而閔煩若古之明訓以疾而謝事近代之通規
眷予邇臣宜加恩典具官持身愿慤迪德端良出於鼎
甲之門自勵材猷之美薦更任使進陟近班遽上封章
願還印綬其勉從於雅志仍增秩於崇階以彰止足之
風以示歸休之寵欽予時命益介壽康可

韓儼加職制

勅雲夢之間復為支郡自頃寇攘屢擾二千石能保其封疆亦已難矣爾以材猷往膺郡寄撫循疲瘵逮此暮年俾進爾職以彰治理之効傳不云乎有功而見知則說矣尚勉之哉可

辛興宗辛企宗降官制

勅無將之誅罔或攸赦緣坐之法厥有常刑豈容私恩輒紊成憲具官早共武服久捍邊陲既稍積於戰多遂進躋於留務屬時逆黨乃爾外姻弗知請罪於私門遽敢露章於政府公為道地輕視朝廷其降領於廉車尚屈從於寬典徃思循省無重悔尤可

湯東野降官制

勅刑辟所繫雖有司存州郡之權悉歸長吏倘容越逸難逭譴呵具官頃以材能躋以待從惟茲警蹕巡幸之地實同輦轂浩穰之區賴爾強明俾之兼治囚徒縱脫實典獄之瘼官讒察濶踈乃自陳其曠職用示防奸之戒聊從降秩之科徃既乃心益圖來效可

田思邁襲封溪洞都督首制

勅春秋列潞子之爵許其慕中夏也爾父世守邊隅克
謹侯度剡章來上以老自陳溪山故封俾爾承襲爾其
敬念忠孝之義永為封疆之臣無忝乃父之訓以欽服
朕命尚其勉哉可

大隱集卷三

欽定四庫全書

大隱集卷四

疏

賀天寧節疏

天德出寧誕聖風標於令節臣能歸美逢時願罄於歡
心屆茲統電之期先以象鈞之候恭臨淨宇仰叩佛乘
恭惟道君皇帝治格三登澤漸九有即常無以觀妙早
從汾水之遊履成功而不居爰整襄城之駕燧林在望

海寓傾心伏願三極垂休百神薦祉以金玉為度佇瞻
八駿之歸與箕翼參光永介萬年之壽

功德疏

正氣為聖早開鳴社之祥申命自天爰契赤符之兆適
臨誕節恭詣祇園乃集緇流聿修象教闡三乘之妙旨
誦十號之徽名廣集殊因仰資宸算伏願天垂眷佑人
與成能副堯封三祝之辭介周雅萬年之壽儀刑四海
用光紹於丕基敷錫庶民期誕膺於多福

又

流虹炳煥夙紀於誕辰華藏莊嚴恭臨於梵宇逢一人
之有慶祈萬壽之無疆式布虔誠爰修佛事伏願照臨
四海如日之升覆燾多方與天無極宸算協萬年之雅
丕基開過歷之符大庇羣生永臻多福

開啟疏

千齡復旦逢真人載育之辰彌月先期集象教無邊之
福冀龍天之衛護嚴香火以薰修廣殖殊因仰資宸算

初中後善惟佛法之難名億萬斯年副封人之善祝
表

天申節賀表

佑下民而作之君誕受穆清之命有大德者得其壽正
昭平格之祥茂對休辰敢忘善頌尊號欽明稽古神武
應期慎儉德而懷永圖抗明威以攝不類彼疆此界佇
臻恢復之功旰食宵衣躬聽憂勤之治已獲天人之助
茂迓戩穀之休保周餘民還夏舊物臣偷安散地綴籍
清班阻瞻如日之光虔祝後天之箕

五百歲而聖人生爰契中興之運億萬年為天子壽敢
殫善頌之誠凡復照臨同增抃蹈尊號誕敷文德載續
武功每懷宵衣旰食之憂弗憚沐雨櫛風之役如江如
漢已震耀於皇威我泉我池即恢張於輿地新又新而
不息旦復旦以無窮臣名綴近班身棲閒居魚樵遁迹
方觀東海之瀾輦轂馳心遙祝南山之壽

賀正月表

獻歲發春會三朝而謹始贊陽出滯推六律以更新以
初為常惟聖時憲尊號中正履位稽謀自天躬六載之
憂勤清四方之氛祲宏開泰運馴致豐亨既順履於春
祺宜永膺於天祉臣久辭禁近假守偏州宣化承流身
在江湖之上望雲就日心馳戶牖之間

賀冬至表

杓回子位律應黃宮亞歲會於晉朝備陳儀品書雲物
於魯史式驗休祥恭惟尊號皇帝陛下睿智有臨聰明
時又神武以恢大業憂勤以御庶邦有臣三千既續修
於舊物闢國百里期光紹於丕基屬剛德之浸亨宜圓
穹之純佑臣久塵從橐適縮郡章身沉落於江湖未迷
楚些心飛馳於霄極徒想堯雲

賀大朝會表

七始載華爰紀履端之序三朝稱慶肆臨會極之朝盛
典時行羣心胥悅尊號德合天德孝通神明應大人休
否之時致太平守成之樂講信修睦使輶交駛於殊隣

正位辨方都邑備修於禮制四方來賀萬福攸同臣昔
在先朝嘗叨儒館懷鉛抱槧久接武於英躔結綬彩纓
獲覩光於元會洎逢舜旦濫玷周行進無補於毫分退
坐安於畎畝靖循疇昔深愧平生何圖衰晚之年重見
升平之運身同太史徒歎滯於周南心若子牟實懷瞻
於魏闕

知吉州到任謝表

清曹持橐久懷竊食之羞列卽分符誤玷承流之寄趣
裝上道涓日涖官已見吏民具宣德意伏念臣衣冠未
裔庠序諸生文不足以廣國華武不足以治軍旅徒自
安於卑位偶拔寘於周行荏苒歲行踐更臺閣負羈勒
而扞牧圉曾微橫草之功造鴛鴦而接夔龍薦冒踰涯
之寵暨頻煩於省闈浸沉迷於簿書深慙無補於朝廷
莫為軒輊頗欲自試於州縣尚可馳驅忽被恩俞遠分
優寄惟廬陵之奧壤居江表之上游田疇因流徙而多
荒井邑經燬災而僅在舊惟揅筆鉅簡之訟繁興今或

弄兵潢池之徒間發豈容孱陋可備藩宣虞詡之得朝
歌親賓相吊襲遂之入渤海寇盜稍平儻可偷安誠為
僥倖尊號堯仁光被湯德又新祈天命而開中興思振
無疆之烈收人心而紓多難載懷共理之良歆惠澤浹
於遐方遣從臣往為郡守臣雖久趨軒陛未嘗歷於治
民然亦粗習憲章或可勉於從政但知循理不敢辭難
少清佩犢之風庶弭爭桑之漸材非吾壽雖無智略之
在前忠類蕭生尚有本朝之雅意

知湖州到任謝表

臣某言伏奉誥命復臣寶文閣待制知湖州尋具辭免
奉聖旨不允已於今月初三日到任訖疏榮內閣復塵
法從之聯假寵名城驟委殿邦之寄威顏不遠震懼靡
寧中謝伏念臣託業簡編起家蓬華以山野戇愚之質
困風波銷鑠之餘造言者每出於無根希意者更從而
下石覆盆終照賴日月之至明朽骨更生荷乾坤之平
施既許過都而入覲因令假道以之官獲瞻睟穆之容

莫副殷勤之問言多迂闊慙無獻替之能職任蕃宣惟切撫循之志靜言忝冒實出恩慈此益伏遇皇帝陛下以大為之資行不忍人之政凡在羣臣之列曾無一介之遺起之邱園放廢之中副以江湖全盛之地溪山清遠閭里阜安全家有飽煖之榮千里無流亡之慮臣敢不勉思策勵圖効涓埃勸課農桑仰體丁寧之意蠲除苛細益推寬大之恩誓畢餘生仰酬洪造

知洪州到任謝表

臣某言伏奉誥命除臣江南西路安撫大使兼知洪州尋具辭免伏蒙詔書不允臣已於今月初九日至撫州金谿縣交割安撫司職事於十七日至本州交割州事訖東國分符曾乏循良之譽南昌易鎮更叨屏翰之優祗見吏民布宣條教顧慙踈拙疊被恩榮中謝伏念臣奮自書生冒居華貫入陪禁闥出總戎行臨櫬無應變之方制勝謝折衝之略寅緣遭遇累玷使令雖縻歲月之多莫效涓塵之益况鍾陵之巨屏據澤國之上游江

山遐控於荆蠻襟帶內連於甌粵地靈人傑尚餘前輩
之風流水走陸馳最為今日之要害非得弼諧之舊曷
當節制之雄豈此妄庸可膺委寄此益伏遇皇帝陛下
裁成萬化總核庶工有鞭笞四夷之心得駕御羣才之
術故如孤遠亦被簡求臣敢不宣暢國威恢張廟算運
籌決策雖匪腐儒之能息盜安民庶免明主之意

知温州到任謝表

臣某言伏奉誥命除臣端明殿學士知温州已於八月
十六日到任訖入奉嚴宸曾乏謀猷之助出臨雅俗猥
當師帥之榮既見吏民具宣條教被私恩而未報竊寵
祿以為慙中謝伏念臣涉世迂疎稟生坎壈久棲蓬於
散地甘蹭蹬以終身累困風波雖恃大明之傍燭每虞
謗毀或傷全度之至仁因黽勉以辭榮庶逡巡而免禍
儻非聖察曷遂微誠還祕殿之崇資副東甌之名郡遠
臨民社職尚列於西清越在江湖心實馳於魏闕惟東
嘉之勝壤乃越絕之奧區當表海之襟喉為行都之屏

翰暫安九廟有香火之具嚴嘗駐六龍覺山川之增壯
士尚傳家之學民無珥筆之風叨此便安實為僥倖此
蓋伏遇皇帝陛下知人則哲待物以誠修政事以圖中
興聚賢材而建大厦謂臣更事多而將老至或可牧民
知臣操心危而慮患深庶幾寡過致茲冒昧盡出生成
臣謹當仰體慈憐彌加策勵秉愚忠而自信堅素履以
弗渝少期歲月之淹粗有涓埃之効

知婺州到任謝表

置散投閑方竊宮祠之祿承流宣化復叨屏翰之除退
自省循益難報稱中謝伏念臣嶽嶽危迹卷曲散材智
嘗竭於守官資不宜於逢世但知事主豈暇營身已期
自放於江湖敢意復瞻於天日沃心造膝未輸獻可之
忠御衆牧人遽冒于蕃之寄遂茲安便悉出恩憐茲益
伏遇皇帝陛下乾覆無私離明徧照以器使人而不求
備因能任職而知其勞致此孱庸有斯僥冒臣敢不祗
服丁寧之訓布宣寬大之書禁戢暴姦冀絕夜鳴之桴

鼓撫循彫瘵庶聞雅俗之歡謠

給事中謝表

紫微書命已叨綴於近班青瑣塗歸復冒膺於華寵衣
頒上楮帶錫兼金揆小已以何堪撫危心而增懼竊以
黃門設官於漢有朝夕侍從之親東臺率屬於唐掌駁
正違失之務雖首號合而為一然事任各有所分論營
造勞人則張公効回天之力指姦邪誤國若袁高著屈
軼之稱必惟其人乃舉厥職顧如臣者疇克宅之伏念
臣學不通方材非適用幼聞詩禮益初有志於科名長
習藝文遂欲脫身於州縣偶中有司之程度竊窺祕府
之圖書未嘗掩貌蠟言以追時好徒苦桂薪玉粟自守
固窮遠去周庭歸安顏巷逮稍階於寸進迺親於百罹
信賦分之多竒亦謀身之太拙頃陪羈勒備歷山川乏
良策以濟時抱愚忠而許國乘長風而破浪亶符深慙
之言駕駟馬而出關偶合終軍之志即邑之干戈未解
閭閻之煨燼尚新帝有恩言既阻於道塗而莫能周徧

民所疾苦又拘於法令而弗即蠲除逮此過歸謂當幽
黜敢圖睿眷俯錄孤蹤叨明詔之前頒與羣賢而彙進
彤庭並敞隔離遙想於神京黃紙聯名摘尾尚驚於誤
筆夫何幸會薦玷要津尊號至德動天沉幾先物委任
無私以凝庶績賞罰必信以厲群工據鞍而謀既錫韓
彭之地當饋而歎正思頗牧之材曾是孱微豈堪驅策
求田問舍甘為豪士之所羞斬將搴旗夫豈諸生之所
習誤膺獎擢彌切兢慙必知稱塞之難愈覺顛躋之易
文章小技已無補於右武之時節誼大閑尚有期於致
身之日

謝轉官表

琳館尸官曾無事任銓曹著令厥有典常自驚沉落之
蹤忽被便蕃之寵凌兢拜命跼蹐知恩伏念臣碌碌無
竒沾沾多易作辭從橐黜典州待當里閭凋瘵之餘值
師旅征行之衆但期免咎豈敢告勞屯戍踰於十旬糗
糧動以萬計元戎第賞常例進於一官清詔觀風遽自

貽於重劾賴聖明之洞照知供億之必時俾遐深文止
還濫賞洎屏居於林藪已絕意於軒裳天官考三歲之
小臣責其獻狀內史裁五色之溫詔爛其及門凡茲予
奪之公盡出生成之造至於進崇列爵增衍爰田矧當
投閑置散之時仍玷君國子民之號名同李蔡妄被樂
安之封學謝韋成獲繼扶陽之緒萃茲光寵併及孱庸
簪履未忍於棄捐江海自忘其孤外尊號乾剛獨運離
照方亨命將帥以出師撫寧中夏操爵賞以厲世駕馭
羣才如臣草芥之微曾預軒墀之末尚推優渥弗以遐
遺取禾三百廛已愧無功而受祿行年六十化更知今
是而昨非

謝轉官表

歲成無狀甘俟黜幽宸命俯頒遽蒙增秩伏念臣久塵
侍從無補事功出領藩符曾微善最已露投劾之請方
思解綬而行敢謂洪私不遺管蒯之賤尚遵常典曲推
雨露之恩因氏疏封啟疆衍食但知多幸實愧罔功尊

號禮厚使臣仁恩遍物不廢有司之法以示天下之公
加賁孱微用光遐外訓詞溫潤知罪戾之既明寵數便
蕃誓糜捐而後已

禮部侍郎謝表

總銓部之劇煩方虞曠職貳禮闈之清簡尤愧叨居已
布俞音嗣頒溫詔揆庸愚而弗稱冒眷獎以奚堪竊以
文昌兼統六官宗伯實典三禮祭祀賓客之式既備其
物宜學校選舉之文悉掌其政今薦罹多故浸失舊章

占旄頭之光不習俎豆之事抱師襄之器散居河海之
間黍離雖閱於宗周赤伏肇隆於有漢謂理軍市者固
無取於鄉飲之禮而尊朝廷者亦有待於緜蕝之儀不
遺瓠葉之微宜舉西鄰之祭欲司厥事可無其人伏念
臣學術空疎智能淺短素乏左右先容之助濫躋論思
獻納之官陪羈勒者三年接駕鸞於九陛頃繇瑣闥擢
寘銓曹蒙穀離次之典既亡各懷欺誕光庭循資之書
僅在靡辨科條徒知以公而滅私固敢違道以干譽罪

固多矣偶未致於煩言幸莫大焉忽叨膺於華寵矧是
夷夔之任夙兼禮樂之司多士指為清流儒臣號稱高
選豈圖懵陋猥玷東求尊號獨運乾剛大明豐照欲投
戈而講藝方修德以振兵宗廟會同不以軍旅而廢禮
情文制作亦將損益以因時申敕攸司俾修厥職孰謂
久虛之位乃容孤進之臣臣謹當紬繹前經討論故實
是儀也非禮也願謹守於此言幼學之壯行之慮弗勝
於其任誓殫夙夜無忝司存

吏部侍郎謝表

掌駁議於東臺方慙無補典銓曹於南省允謂非宜已
驚渙汗之難回更沐出綸而申諭凌競就列龜勉包羞
竊以六官之聯職守雖均於奉法三銓之任典司尤在
於擇人惟並用而不偏乃可久而無弊晉魏之際任人
而不任法故德行文材或取於一時隋唐之間任法而
不任人故身言書判必嚴於四事逮聖朝之有作稽歷
代之攸行柬拔既在於朝廷資格悉歸於選部樞機品

式咸具吏不容私刑名分守已明士無犯義比屬干戈
之擾靡存典簿之傳稂莠並興難以循名而責實鳧鷖
自恣惟知弄法而舞文益琴瑟之不調致風波之易動
然一於守法所以為至公也則不能免煩苛留滯之讒
專於用人所以為通變也則無以革欺詐誕謾之弊實
今日之共患豈公朝之所宜必得通材允釐劇部伏念
臣羈孤寡與樸拙無能屈身州縣之間豈懷榮望接武
圖書之府已過初心連蹇十年淒涼萬狀遇鑿輿之巡
幸起塗巷以騫翔薦歷卽曹漫升禁路方懼竊位素餐
之責敢萌拔茅彙征之心遽被異恩超居司列念顛躋
而必去矣顧冒昧以處云何遜避弗從震驚失措尊號
剛健中正欽明文思以道觀能將使分職而率屬用人
惟已皆思壞植而散群欲威德之兼隆策文武而並進
致茲謏薄亦預使令臣謹當祇奉簡書審核情偽並緣
靡容於姦吏拘攣宜略於細文火清弊源庶弭群議論
思弗效固非嚴徐侍從之材條理惟精願繼裴馬銓衡

之譽

謝宮祠表

冒居煩劇慙非立斷之材規求安閑遂竊便私之幸恩
從願始感自中深伏念臣頃玷近班黜臨遠郡身敢懷
於擇地志將在於息民惟簿書期會之勞粗知龜勉若
錢穀申兵之事曾弗習知值更戍之頻仍顧里閭之凋
瘵玩歲愒日雖期補過於目前任職居官深恐憂生於
意外輒緣私計仰丐眷憐獲棲息於祠庭尚叨糜於稍
廩蒙恩甚厚負愧則多恭惟尊號明並日升德侔乾健
觀能以道而不求其備使臣以禮而得盡其心顧如臣
愚亦被上施思長林而志豐草幸同麋鹿之遊飲墜露
而飧落英頗適江湖之興少休駕蹇終效涓埃

狀

辭免中書舍人狀

聞命震恐罔知所裁竊以法從近班詞臣高選用入得
失繫國重輕豈容疎愚濫膺超擢伏念臣受材無取賦

分多竒偶玷詞科遂躋儒館十年留落自抵於困窮四海孤寒曾無於黨援逮陪警蹕之巡幸遽遭道路之流離盡棄青箱秬慙空腹豈圖睿簡俾掌贊書退省無堪必難勝任伏望曲回洪造追寢誤恩非特厭於師言實少安於愚分

中書舍人謝狀

叨奉宸恩俾司外制顧文辭之無取荷簡拔之非常竄由推借之私有此遭逢之異階前紅藥帳坐隔於雲霄閣上麒麟幸日陪於步武慮勤典謁不敢造門感愧之深敷宣罔既

辭免給事中狀

聞命震恐罔知所裁伏念臣受材無他涉世尤拙頃自叨塵詞掖已慚潤色之非工若使進處瑣闥豈復論思之有補比持使節遠適江湖無所將明遽更寒暑自度必貽於嚴譴敢期前布於明廷徒懷非據之憂更切多言之畏伏望陛下曲垂天鑒俯察臣誠收還誤恩庶安

愚分

辭免吏部侍郎狀

聞命震恐罔知所裁竊以天官三銓於列曹為劇部文昌貳卿在搢紳為高選自艱難以來典籍散佚真偽混淆必得強敏精明熟於吏事者乃能振職况今羣材居外被召而未至在廷執事惟臣等輩數人雖云乏使豈宜輕授伏思臣材力緜弱地勢孤寒昨被誤恩徑躋禁路叨塵兩省無補萬分忽奉俞音俾司銓綜重念臣憂患飄零之餘心志凋落動多健忘目視昏花非惟進用超越必致人言亦恐職事曠弛自速罪戾伏望追還成命以安愚分

辭免禮部侍郎狀

聞命震恐罔知所裁竊以宗伯之官任兼禮樂自頃典籍散佚朝廷一有禮文之事則官吏愕眙莫知其原念掌故之弗存雖求野而莫獲則夫分職率屬以典司厥事者詎可輕授其人哉伏念臣未學庸受單見淺聞自

分羈窮初無榮望頃自叨塵二省已乏寸長可稱擢置
天官益慙非據弗思與物多忤惟務當官而行罪戾已
深方圖自劾敢期睿眷遽易清曹非惟孤跡之難勝亦
恐煩言之可畏伏望收還成命改授一閑慢職局庶安
愚分

辭免徽猷閣待制奉狀

伏念臣疎拙愚陋誤蒙陛下拔擢置之從班於茲三年
雖居官任職自竭駑鈍然艱難之際毫無所補揣分量
材所宜譴黜久矣今者重沐寬恩付之劇郡尚被朝廷
任使不敢辭難若乃延閣次對是為近臣高選退循孱
瑣非所宜蒙伏望收還成命以安愚分

辭免筠州恩命第一狀

承命震恐罔知所裁伏念臣謏薄之資誤塵法從投閑
累歲分所宜然今者忽被聖恩起於祠庭付以民社之
計義當奔走上道以趨官守重念臣流落之餘僑寄異
縣家貧累重婚嫁失時今若遠適江西數千里之外私

計實為狼狽兼臣今任官祠合至來年三月任滿欲望
聖明特賜收還成命令臣終滿今任異日或有驅策臣
不敢辭

第二狀

承命震恐罔知所裁再瀝肝腑仰塵天聽伏念臣叨處
祠宮坐糜歲月無功受祿每積兢慙非不欲痛自激昂
火圖報稱誤膺渥澤尚何敢辭實緣臣十載飄泊僑寓
江海家貧累重婚嫁失時未畢所謀勢難遠適所以冒
昧陳述兼臣迹跡海隅杜門掃軌未嘗敢希求試用而
居處之陋使令之乏比於為郡榮悴不同蓋臣賦分竒
窮觸事齟齬雖欲勉強承命有所不能若以稽違詔令
獲罪臣亦無以自解伏望聖慈照察許臣終滿今任官
觀容臣別具陳乞誓竭駕蹇以効涓埃

辭免淮寧府恩命狀

伏念臣謏薄之資碌碌無取投閒置散分所宜然荏苒
歲時困約彌甚今者誤蒙聖恩付以大郡非臣愚之所

克堪竊以宛邱巨鎮密邇舊都宜得望實兼著之人以
為屏翰臣若貪冒榮寵深恐必致人言欲望聖明照察
追寢誤恩以安愚分

舉孫傳自代狀

伏覩文林郎孫傳學有本源文兼體要材周於用深知
世務之宜器藏於身不求衆人之譽置之近列必有可
觀臣所不如舉以自代

舉楊正權自代狀

伏覩廸功郎新兩浙路提刑司幹辦公事楊正權廉靖
之操不求於人典則之文庶絕於古真之朝廷必有可
觀臣所不如舉以自代

舉蔡居中自代狀

伏覩承議郎前太學正蔡居中行能兼備文學俱優早
擢甲科久沉下列揆其材器宜在朝廷臣所不如今舉
自代

舉薛嘉言自代狀

伏覩承議郎新通判舒州薛嘉言文辭典麗操履清修
早擢詞科久淹書局恬退自居器業彌充流落外遷衆
論嗟惜觀其所蘊臣實不如舉以代臣實允公議

舉楊愿自代狀

伏覩承奉郎樞密院編修官楊愿忠義之氣勇於敢為
文學之優多所自得比膺召擢益奮才猷臣所不如今
舉自代

應詔舉官狀

準尚書吏部牒奉聖旨應內外侍從各舉所知三人以
上如有不實同罪保舉臣今謹遵詔命舉所知如後一
員朝散郎直龍圖閣主管建州冲祐觀祖秀實操守堅
正學業深醇久在上庠晚擢高第剛方之概鯁直之風
孚於衆言共推碩士屢經任使歷著能聲謂宜召還以
備朝選一員朝請郎提點江南東路刑獄公事即昂儒
學決科材能任職累歷省府寺監之選所至靡不辦治
宜備朝廷清要煩劇任使一員從事郎添差兩浙東路

安撫司幹辦公事王揚英性資溫厚文學貫通可備館閣清要任使右具如前所舉如或不當臣甘受謬舉之罰謹錄奏聞

應詔薦士狀

惟建炎四年五月十二日勅節文臣寮上言乞詔臺諫及左右司郎官已上各薦二人隨材任使者臣伏覩承議郎新通判溫州柳綽性資爽邁材術優長試之劇煩必有能效從事郎衢州江山令呂求中名臣之後材力有餘泣政臨民威惠兼著伏望特賜召審擢用以備任使

舉胡銓應十科薦士狀

伏覩左承直郎前吉州軍事推官胡銓早富文藝峻擢甲科去官累年恬養自守杜門讀書深究治體議論堅正剛而不屈臣今保舉堪充節操方正可備獻納科如蒙朝廷擢用後不如所舉及犯賊入已甘伏朝典

劄子

建康上殿乞置史官劄子

臣聞今之所以知古後之所以知今不可言傳必憑諸
史史者國之典也孔子作春秋於隱桓之際則彰於定
哀之間則微辭雖不同記事之文未嘗一日廢也臣竊
見朝廷自艱難以來典籍或廢而不錄陛下龍飛商墟
駐蹕淮甸旋幸江吳又幸建康其間一二大節皆史臣
所當謹記而息書人今又秘書省權罷著作日歷之局
久廢深恐士大夫各矜所見私自記錄好惡不同是非
失實既無有司載籍異時難以考證臣願陛下慎選文
學之臣兼領著作或專置一二員以日歷按隸門下省
除百司闕報事節仍許其參以聞見裒類成篇上之御
府以補異時之闕文雖多事之日亦不可後也

江西使回越州上殿劄子

臣聞將帥之任有進無却是以古之善將者受命之日
則忘其家臨軍誓師則忘其身豈有見敵不擊移患於
民者哉伏覩去歲之沿江設備分命諸將各據要津而

大敵之來鮮有賈勇而前者徃徃退保旁郡而所至州縣困於供億或厚獻犒設或剽掠平民其深入閩粵者為患迄今未已臣謂陛下賞太重罰太輕非所以御將帥弭寇敵也今茲已迫盛秋敵騎盤礴於淮南者尚多分戍脩禦乃適其時臣願陛下明詔諸將各務奮擊以振國威榮勲第賞當倍常等其或不應徃州縣而輒徃者必罰無赦州縣監司敢以金帛過為犒設者並坐以罪如此則敵所不至之地州縣之民尚得保全安息實今日之急務也

江西使回越州上殿第二劄子

臣聞書曰一人有慶兆民賴之此言人主安則兆民安也又曰四方無虞予一人以寧言四方寧則人主寧也蓋君之與民名分雖殊而安危之勢其體則一故曰君以民為心民以君為體此古今之通論也陛下臨御之初謀國之臣不能深思遠慮以天下安危為計但為說曰吾奉鑿輿於安全之地而已逮維揚震驚倉猝南

渡則前日之說亦已窮矣以今日之事觀之財賦益窘兵將愈怯議者謂先事而動則慮漕運之不繼糧餉之不給而吾之力屈矣今呂頤浩辭疾而未至劉洪道宿留而未行趙曠除逮康守雖非禦侮之才而尚未聞之官則沿江控扼之事果何恃以為備也臣願陛下深察事機預圖長策勿以敵騎稍去而怠於防守以保生民以幸天下無待警急之際徒為集議而已

論時事劄子

准尚書省劄子備奉手詔以保民弭盜遏虜寇生國財等事令侍從台諫條具奏聞者臣竊以陛下即位以來於茲五年寇難日深政治未洽雖未發於聖問而臣已竊怪其故久矣然陛下日晏坐朝宰輔大臣遠猷辰告諒無急於此數者而今日所以為國實在於是矣臣詎高言闕論以汙陛下之聽覽哉臣伏以方今外有強虜之侵暴內復寇盜蜂起田野之民不得保其耕桑城郭之民不得安其居室漢沔之盜即趙魏齊魯之盜江湖

之盜即漢沔唐鄧之盜也如是而欲保民曷可得乎淮
泗之南不能守棄而之江吳江吳之地不能安轉而之
海道甲兵不足以當戰陣之鋒城池不足以為扞衛之
固講防守之策者不過於順動居將帥之任者每謀於
退保如是而欲保民何可得乎然則寇虜未已盜賊未
息雖欲保民臣未之聞也今陛下躬履艱難之運親見
禍亂之源憂勤求治非不至此然自建炎迄於今將益
貴而難御兵日驕而難使所以備爪牙之任總虎貔之
師者三大將而已昨遣劉光世防江之後李成猖獗因
欲復遣大將而意頗難之始聞車馬有親征之舉臣愚
不知陛下留輜重而自將輕騎以擊張炎能如漢光武
乎結雨服於鞍以伐高麗能如唐太宗乎群議不同斯
謀既寢乃畀張俊以昭討之權實任專征之寄今則寇
在江東而俊已趨江西矣然今日之將貪賞而冒利養
寇以全身皆非豪傑之士也今日之兵招安於寇盜之
餘強刺於驅虜之後皆非節制之兵也如是而欲遏虜

寇弭盜賊人皆知其難矣今江湖之間大將有如楊惟忠張俊者舊相有如呂頤浩宋勝非者皆任之以掃除羣盜之事然兵火而不可分糧乏而不可繼此勝負所以未決也臣願陛下訓齊戎行繕修備禦拔卒為將以求可用之材以仁愛民無失天下之望則盜庶幾能弭虜庶免能遏然後可以圖中興之業矣臣又觀今日郡守之任其選太輕願稍革承平之制參文武而並用之亦保民之一端也昔太祖皇帝削平僭偽始罷方鎮在建隆開寶之間居方面者亦多功臣宿將其後稍稍易之夫今之守臣惟考其資序之高下不量其人材之優劣方其無事則治簿書以偷歲月之安及其有警則懷印綬而為遁走之計大抵皆昏耄震駭不知所為其能指麾吏民為戰守備者亦已鮮矣城郭之民何賴焉今議者稍欲拔賦吏號為有材而任使之臣謂與其任賦吏不若任武吏也願詔大臣選擇實有材武者及曾經出戰有軍功人與文臣相參委之列郡平居無

事則專於按習軍馬緩急即以州事付之聽出戰捕賊
庶絕列郡足以隆藩屏之勢矣臣聞記曰生財有大道
生之者衆食之者寡為之者疾用之者舒則財恒足矣
後世用度無藝賦取無制遂行傷財害民之政榷酤鹽
鐵均輸平準自漢唐以還凡可以圖利者無不為矣國
朝兼修歷代之法而常有財乏之歎雖使桑弘羊孔僅
宇文融楊紆之徒復生亦無所施其智巧尚何生財之
可論乎臣謂今日正當節用而已况輿地既狹而賦入
有限道路多梗而漕運不通盜賊既衆而耕桑失時於
此而不節臣即恐他日必有上下俱敝之患漢唐兵革
之際至於內糴之膳不繼百官之服不給每覽載籍為
之寒心然今日軍旅之費太多胥吏之給太厚僥倖之
祿未減於平時橫取之物繼入於內府如是欲財豐而
用足不亦難哉議者方獻生財之說以惑陛下之聽臣
聞昔桑弘羊為平準均輸法號為民不加賦而上用足
然其法不過陰奪民利而已此乃桑弘羊欺漢武之

言太史公書之以見武帝不明爾當是時奄有四海尚
可施為今陛下播遷吳越已失天下之半摧酷之價既
日增於舊茶鹽之釵又屢變其法今日所謂生財亦無
踰此雖欲加賦而賦不可加雖欲奪利而利不可奪餘
民無絕尚忍培克之乎願陛下深念節財裕民之義自
上以及下由中以及外一切遵於節儉敢有言生財者
罪之則無傷財害民之政矣陛下勿謂降一德音下一
手詔為足以示天子之仁懷百姓之心若無實德之施
適足以取怨於人爾譬之父母之愛其子告之以矜憐
撫恤之言而顯奪其衣服飲食之具如是而謂之愛其
子乎雖孩提之童不可欺矣此又保民之尤急者也臣
無狀備數從官雖早夜以思徒憂禍難之未已是以敢
竭其狂瞽以仰答聖問亦以少謝尸祿素餐之責而已

大隱集卷四

欽定四庫全書

大隱集卷五

宋

李正民

撰

啓

賀帥冬啟

日臨南極占化景之舒長律中黃鍾驗微陽之來復道
由時進福以類升某官職妙元龜材推隆棟贊元經體
夙殫許國之忠宣化承流暫倚維垣之重世資耆哲帝
賴明謨既順履於休辰宜倍膺於介祉復還鈞軸大庇

黔黎某叨綰卽章獲依河潤莫預賀賓之列徒深善頌
之誠

賀趙叅政啟

光奉制書榮叅攬柄郵傳播告輿頌歡呼竊以禦寇敵
之侵上策莫如自治尊朝廷之體彊本則能折衝歷觀
比歲以還仰止一堂之近輔弼任輕而異於進退臺諫
氣銳而動輒抨彈上無以當明主仄席之心下無以副
疲民息肩之望第徒勞於土苴靡暇瞻於曠芸爰求舊德

已試之賢稍清一時流弊之末必視覆車而知戒謂宜
解琴而更張效周墀之無權姑務於大體若謝公之經
遠不求於近功然後運沉旒帷帳之中制廟勝樽俎之
上使遠邑望風而知畏庶黎元按堵而有歸遂致中興
悉還舊物惟四海所望如此在今日非公而誰某官業
貫群倫道侔前哲渾然河山之氣卓爾關陝之英直大
而方應羲易坤元之二智仁且勇備天下達德者三挺
誠節於中司運良籌於右府輟一路撫綏之寄叅四輔

贊襄之聯和羹允待於鹽梅大厦式資於梁棟惟經綸
之蘊必陳臯陶底績之謨需功業之成尚述王褒得賢
之頌某方安散地曼阻崇墉側聞成命之行徒極懽悰
之積

賀翟叅政啟

顯膺制命入預政機國步方艱允賴更張之舉上心俾
乂爰資傑異之材播紳聳傳廟堂增重某官誠明毓粹
雋偉邁倫英名擅于八區高眇邈於四海班聯玉筍自
結明主之知任寄麟符夙昭黎民之譽久游琳館遽解
塵纓傳岩因帝夢以旁求謝安為倉生而再起果符睿
眷亟贊民謨步驟儒林素負孔融之高氣翼扶國運更
觀公瑾之盛心佇期功烈之成式展經綸之蘊某久塵
近著方蒞小邦進有後先雖聞荊州而願識義均休戚
且欣樂正之有為瞻頌之深敷宣罔既

安撫李叅政啟

久持從橐無補事功寵俾州符尚寬罪戾獲在按臨之

下實為幸會之多某官明哲起群謀猷經國比懇辭於
大政暫偃息於雄藩吹之噓之已甦凋瘵之俗晏也粲
也行臻富庶之風即奉璽書復歸廊廟某比汚近著密
借餘光昔在門墻嘗有一日之雅今茲官守遂託二天
之仁瞻詠惟深敷宣罔既

賀沈叅政啟

總師簿伐扈蹕言還清醜虜於淮瀆震天聲於邊徼執
俘斬馘大挫犬羊之鋒布令陳辭式警鷓鴣之性惟廟
謨之決勝假將畧以宣威國勢既隆民心胥悅某官英
姿不世爽氣殊倫芝草鳳凰來作明時之瑞南金東箭
允為內府之珍糾殫既肅於措紳眷注遂隆於旒宸撥
煩治劇尤高銓綜之稱宣化承流暫試藩垣之重亟趨
節召入觀楓宸玉堂之地深嚴黃麻之文溫厚晝接嘗
留於步輦夜談載炳於金蓮遂膺亞相之求式贊繁槐
之任漢廷黜陟允資丙吉之同心周室將興孰云山甫
之莫助休功可望公論皆然某頃綴班聯嘗陪步武方

欽定四庫全書
卷五
授閑於祠館欣誕布於論言亟聞警奏之傳稍致賀牋
之緩其為悚怍曷究敷陳

賀席叅政啟

光奉制書入叅樞政廟堂增重華夏交欣竊以君臣之
義相須非賢不乂危安之時靡一得士者昌經營維本
於人謀輔佐實資於天祐降神崧嶽用恢復於周邦夢
弼傳巖遂增光於商祚矧鴻圖之中啟顧亨運之有開
既賢者因時而興宜聖主不次而用某官學臻闡奧材

擅經綸房喬之所長在謀陳平之有餘於智高文大冊
雍容兩禁之游激濁揚清更踐六官之長上心乃眷公
望攸歸遂膺當守之求亟贊秉鈞之任某頃倍近著嘗
覲光塵側聽緒言見心期之甚遠諦觀符采知柄用之
不遲迺聞成命之行彌極歡悰之積

賀都督呂相公啟

誕揚制命寵昇戎昭遠考成周分陝之規近稽東晉都
督之號六帥增氣四海傾心恭惟某官明畧佐時雄才

應運道之源而德之藪所資者深文之傑而武之英無
施不可元勳爛於竹帛貴名昭於鼎彝惟中外之迭居
皆將相之劇任比再躋於鈞軸實增重於廟堂裴度來
朝毅將咨嗟而出涕子儀入覲詭辭造膝而無嫌朝恩
由是以沮謀逢吉因茲而去位一新師律載整朝綱以
萬民離居為憂以四郊多壘為耻灼見扶顛持危之術
深陳救焚拯溺之圖劉琨以逆虜未梟猶枕戈而待甲
且陶侃思中原致力乃運甕而惜分陰豈懷安以敗名
將馳騫而不足上心攸注民望胥同遂宣出征入輔之
勞盡總尺籍伍符之衆淮陰之拜大將曾弗預於謀謨
王導之秉重權亦無聞於征伐兼舉二柄創見一時袞
衣繡裳繼姬旦東山之詠輕裘緩帶同羊祐夏南之行
佇期功烈之成式展經綸之素業知惟舊荷德實深
方武節之是宣顧腐儒之安用拘縻符竹流落江湖負
朱羽以臨顏行慚無壯志曳長裾而陪後乘莫佐下風
側聞渙汗之傳彌切搖旌之慕欣愉徒極敷叙奚固

賀知慶州侯脩撰啟
光膺宸命榮領雄藩顧惟幸會之多獲託鄰邦之好某
官智周而材贍文麗而學優早踐亨塗藹聞令望比顯
躋於柱史已深簡於宸衷時乎未可有為天將降其大
任暫躋論撰之職出分藩翰之權乃眷大邦久厭群盜
潢池多警欣聞龔遂之單車錯節尚堅正賴虞卿之利
器涓辰云吉布政惟新已騰載路之謠遽辱貽書之既
某嘗接武旋歎分襟念出處之難期曾何加損顧愆尤
之已積不自覺知夫何譴逐之餘乃沐撫存之厚永言
欣抃曷既敷宣

賀樞密權端明啟

伏審顯膺制綽榮贊樞庭右府談兵允賴謀猷之助巖
廊圖治實均輔弼之求凡預庇庥舉同欣抃某官資兼
文武學貫天人智略通於萬方冲和備於四氣飛英庠
序列職師儒名與時而益彰材因事而乃見當傾側擾
攘之際歷艱難險阻之勞詠溪堂之詩方美扶風之政

紓楚國之難孰先令尹之忠旋臨泣於近邦遂總持於
大計入殫猷告適契上心正宥密之需賢矧經綸之在
抱天寒既至松柏知其後凋猛獸在山藜藿為之不採
必有折衝於樽俎之上乃能息兵於潢池之中馴致太
平益光洪烈某夙陪近著嘗覲下風側聞成命之行第
極懽悰之積

賀樞密胡端明啟

光膺綸制榮貳樞庭華夏聳聞措紳胥悅竊以司馬掌
邦政周官嘗兼以上公太尉本五兵漢儀實次於丞相
矧本朝循近古之制而右府為樞密之司將相交修文
武並用方時多故操縱或預於台衡論職有嘗委任宜
專於帷幄爰迪師中之吉式資堂上之竒某官當世名
儒中朝宿望川渟岳峙渾然器宇之存玉璞金相展也
質文之備自親逢於華旦已平步於要津離著位者七
年蹈險夷而一節小雅之什盡廢周室中興淳耀之烈
未渝晉朝南渡欲扶歸運當得偉人天子喜其來歸曾

是甘盤之舊勳敵畏其風采允符漢相之威應大人休
否之期竭近臣盡規之義果膺成命入贊鴻樞以道覺
於斯民信伊尹之自任好善優於天下宜樂正之有為
佇膺鈞軸之重權誕闡經綸之大業某支離散吏浪漫
畸人叨陪正始之諸賢縱觀開元之四部秉青藜而辨
蠹嘗借餘光對方罪以沈思獲窺妙算旋因漂泊絕企
光塵慕鴻鵠以高翔亦云久矣同燕雀以相賀徒有志焉

賀知秀州王直閣啟

光膺宸命榮鎮近藩涓時日之惟良布教條之甚穆顧
茲僑寓久託部封海角遁身方希於小隱祠廷竊祿有
賴於餘輝適因負薪之憂尚阻造門之謁其為欣悚豈
易敷陳

賀李龍圖知虔州啟

及瓜受代解組還朝奉計三年已聞於優最蒙休千里
諒結於去思某官迪德溫良賦材瓌傑卽序之聲猷夙
著卽國之政事甚修衆口鑠金顧何傷於明哲君子如

玉終自守於堅剛將趨文陛之嚴行陟近班之峻某久
棲鄰壤竊借餘光喜瞻飛鳥之歸遽失卿雲之蔭傾依
徒切敷叙奚周

吳運使啟

顯膺綸命榮涖漕臺允預庇休舉同欣抃竊以江西諸
郡昔號富饒廬陵小邦尤稱沃衍一千里之壤地秔稻
連雲四十萬之輸將舳艫蔽水朝廷倚為根本民物賴
以繁昌逮更比歲之凋殘無復承平之彷彿強悍者或
操戈以拒吏催科雖嚴而難必行困窮者方接穗以供
軍饋餉已多而猶不足非講火耨水耕之術寧無頭會
箕歛之傷儻徒峻於文移亦何裨於事實某官宏材濟
務厚德鎮浮久踐歷於亨塗益發揚於雅望未攄遠大
之業暫分飛輓之權甦此疲瘠久資謀略某謬膺即寄
方託使輝涓日時之良已承問俗裁尺牘之禮恭布賀
誠

安撫趙樞密啟

顯膺宸命移鎮帥藩幕府初開輿情胥悅某官謀猷經
國明哲持身堂堂柱石之姿渾渾河山之氣讜言正論
早推臺諫之聲遠奠深圖進秉樞橈之任身雖屈而道
不能屈時可行則義與之行起偃息於殊庭作藩垣於
會府惟時南服實重兩邦俯控長江相望千里山川天
險有同關中河內之雄師旅雲屯固異霸上棘門之衆
欲恢遠畧允賴宗工祭戟來臨都督已隆於雅望旌旗
改色臨淮夙著於威名諸將稟從列城倚重某投閑得
請侯代少留方圖千里之行敢忘一日之庇張敞守郡
胸臆固已亡竒羲之去官刑政疲於簡對尚依樾蔭終
脫譴訶顧符竹之有拘造門闌而莫逮欣愉徒切敷叙
奚周

提刑丁郎中啟

光膺宸命榮奉使華問俗觀風已竦傳於清致裁刑折
獄復推廣於仁恩凡預庇庥同深欣忭某官材猷博敏
學術深醇久踐歷於亨衢尚韜藏於遠器暫領外臺之

柄即躋近著之榮顧此孤踪夙叨末契蓬山抱槩早接
於俊遊畫省握蘭繼聯於同舍方在譴訶之數乃居臨
按之中仰蕪孺之天欣逢故舊辨會稽之政必賜矜全
欣忭之私敷宣罔既

答館職啟

寵膺明命讎校必文詔旨初傳士倫昏慶竊以國家舉
久曠之典所以明試於人材修已廢之官所以儲養於
英俊待以歲時之久須其望實之孚取而用之有可觀
者惟茲首選宜得異材某官文備四科學該九變韜千
將而未試懷良玉以自珍落筆鑿坡論治明乎大體奏
篇黼衣稱善發乎至言果符側席之求遂冠登瀛之舉
蓬山疊阻歎夢寐於舊遊策府載開喜典刑之尚在重
煩左顧兼沐長綫愧感之私敷宣罔既

謝中書舍人啟

充員省闈方叨宰士之聯承乏掖垣驟玷詞臣之列退
惟涼薄彌切兢慚竊以內朝供奉之班莫非德選西省

贊書之地尤謂才難朝廷以為美官文士號稱極任循
沿流弊第傳三字之除釐正經常復押六曹之奏既聚
五花之判益嚴四禁之規豈傳掌于王言實兼行於吏
事非文章爾雅而訓詞深厚不足以潤皇猷非日月獻
納而朝夕論思不足以達國體必善為于辭令且明習
于憲章選而用之惟其宜矣如某者襟靈至陋學業非
工文采固無竒樸邀不足數早緣薄藝誤玷詞科濫陪
英俊之遊敢起滯留之嘆十年流落百指困窮相良馬

而利必違學御龍而技無用重遭世難偶獲生全敢圖
漂泊之餘乃有遭逢之異掌絲綸之美幸克紹於祖風
習臺閣之儀或未慚于寒士謂嘗攝職仍免試言永惟
有國以來不過數人而已某官盛德經邦元勳衛社卓
犖生人之傑縱橫王佐之才尊主庇民功莫高於鄧禹
矯情鎮物衆方賴於謝安思與羣賢共持丕業遂令踈
遠猥預陶甄然念世荷國恩身逢時故橫梁鞍馬之上
未効微勞寄號節之間已慚遠慮惟當盡節豈復謀私

某敢不溫習藝文收還神觀辭源已涸雖乏湧泉之稱
典籍尚存冀免師心之誚誓堅素履圖報洪鈞

吉州到任謝執政啟

持橐三年猥玷從臣之列分符一旦遽興逐客之嗟仰
荷陶鎔已祇官守伏念某行能無異艱拙有餘豈妄意
於功名竊自娛於文史偶緣遭遇徧歷高華後省備員
更獻納論思之職南宮率屬乏文學政事之長鸞鳳之
技既窮駑馬之力亦竭欵銳進則小器不可大受欲冒

處則清塗難以久妨頗宿留以懷疑思彷徨而引去忽
承恩旨遠卑藩垣將內訟於愆尤分宜投於閑散鳧飛
鴈集本無繫於公朝鷄尸牛從尚竊懷於私計念干戈
之未解慨田園之已蕪且圖餬口於四方未能忘祿乃
使佩青於千里詎可辭難惟承命之甚嚴免携孥之不
暇棲蓬近即侯吏卒之鼎來偃薄初寒幸道塗之無壅
小邦雖云遠外平日素號劇煩兵革游侵閭閻非舊田
萊荒廢斗米之價未平墟落凋殘比戶之氓半在豈容

鈔定四庫全書
卷五
尋陋可備藩宣雖能知命而不憂尚愧見幾而必斷但
勤夙夜寧較鎔銖某官明畧佐時英材命世伊尹聖人
之耦澤被斯民固勃社稷之臣義形於主憤國威之久
蹙嗟世難之未夷並建群英大凝庶績顧茲疲懦難備
使令俾聯五閣之班出奉一麾之寄疏榮若此論報謂
何敢不畏此簡書先於惠養軍旅之事未之學也勉企
於前修言行之宜可無慎乎更防於後患

謝建康張寶文啟

艱難之際賴侯伯以為藩垣凋瘵之餘資惠愛以綏黎
庶承下車之未久聞布政之已孚某官材應時求德昭
民譽遇盤根錯節而別利器之用因震風凌雨而知履
屨之安逢辰游動於干戈受任屢當於屏翰惟茲建勦
實古名都方移蹕之未遑乃分符而共理枕戈勵志豈
後祖生之著鞭秉傳諭民已聞渤海之賣劍佇聆褒詔
即踐禁塗欣頌之深敷言曷究

謝孫宗博惠詩啟

高秋搖落見宗武始生之辰壯齒遷流當孔融過二之
歲偶故人之邂逅辱佳句之愉揚感黃菊於邱園空嗟
僑寓誦蓼莪於風雅永負劬勞深慙華袞之榮曷效瓊
琚之報笑宦遊之久因知難並於甲辰念得失之相承
諒有同於磨羯其為欣悚未易敷陳

與知秀州劉待制啟

涓辰惟吉布政云初輿頌載揚周邦咸喜某官躬行德
義世濟忠嘉蚤參荷橐之榮久奉珍臺之逸暫遊蓮幕
載錫麟符將還嚴助於承明聊試望之於馮翊惟時闔
境方困旱災望族高華施設行觀於廣大疲民凋瘵撫
綏端賴於寬仁佇臻循吏之風非獨寓公之幸

與提宮劉待制啟

叨奉宸恩誤膺卽寄獲居仁者之里忽貽記室之書拜
貺惟勤揆能增愧某官學深道奧德冠民彝早領袖於
儒林亟翱翔於從橐暫息殊廷之逸行膺前度之咨某
昔預校讐嘗陪步武萍蓬千里久馳想於風猷江海一

麾仔親承於音旨承言欣幸曷既敷宣

謝平江湖待制啟

光膺中詔進陟近班綸命初傳輿情胥悅某官道扶皇
極德冠民爨體備四氣之和文漱五河之潤早擢科於
高妙即結綬於清華率惟茲有陳已賴甘盤之舊學在
德不以大方資鄧禹之遠圖復躋荷橐之班仔聽鋒車
之召某為僚滋久投分實深盧毓以常士為有名第愧
尸官之無補安石為蒼生而再起尚期賢業之有成欣
抃之私敷宣罔既

回鄰郡啟

叨奉宸恩誤膺即寄獲託鄰邦之好實為幸會之多某
官材映士倫望隆朝著久屈藩垣之劇即躋臺省之華
善政報成賴餘波之見及提封接畛亦擊柝之相聞瞻
詠之深敷宣罔既

回袁州趙守啟

顯膺宸命榮剖藩符顧惟幸會之多獲託鄰封之好某

官材猷敏達德字冲深卓爾宗室之英渾然清廟之器
險夷備歷忠孝兩全尚藩宣於小邦未翊揚於遠業涓
辰云吉布政惟新已聞載路之謠遽辱貽書之貺提封
攸屆實擊柝之相聞潤澤所漸賴餘波之見及永言欣
抃曷既敷陳

回信州李守啟

久陪軒陛罔著勤勞遠假麾符幸寬罪戾已恪居於官
守方曼阻於封圻曾修記之未遑第馳情而曷已某官

材宜用世仕以學優治劇撥煩每從容於為政任重道
遠期康濟於斯民尚分千里之憂即奉五雲之對某趨
風惟舊荷顧良勤比緣行役之餘獲預樽壘之末聽笑
談於足塵幸接清徽傳翰墨於置郵益慚謙德永言感
悚豈易敷陳

答朋友啟

叨奉宸恩獲棲琳館再竊無功之祿徒增有覲之顏某
潦倒無堪欽崎可笑早緣薄技濫陪英俊之遊晚玷從

班遠在艱虞之日久投閑散復見清平方乘傳於遐陬
忽陷身於異域東隅已逝空眷戀於桑榆三徑就荒嘆
凋殘於松菊甘腐儒之麤糲對黃卷之聖賢問舍求田
杳無涯涘從徒乘馬寧敢覬覦未忘干澤之心薦有叩
閣之請方虞嚴譴遽奉俞旨靖惟朽質之無庸實愧素
餐之何補某至誠與善盛德包荒早聯金石之交密借
吹噓之助更紆雅思寵示長牋文采爛然宛若靈芝之
三秀揄揚過矣豈惟華袞之一言感佩惟深敷宣罔既

又

禮行於郊誕布配天之澤賞延於世爰敷任子之恩凡
庀職於從班悉推榮於京秩顧惟忝冒彌切兢慚早侍
軒墀蔑有涓埃之補久栖湖海第從鳧鴈之羣載覲休
成猥霑大賚少時辛苦力紹家聲晚境憂虞遂忘世味
沐恩波之游至覺緣累之已輕過諸郎而擊鮮難希陸
賈遊名山而採藥方慕向平敢謂謹勤遠垂慶問永言
感佩曷究敷宣

洪舍人講易啟

德無常師尼父常勤於問禮學不可已次公猶急於傳
經况聯寮案之間獲奉講磨之益微言既闡滯念頓開
竊以易之為書深不可識聖人設卦強為之名潔靜精
微冠於五經之上廣大悉備行于三極之中歷伏羲文
王而其道全至周公孔子而其辭具分六位而成體兼
三義以無方天未喪於斯文嬴相指之為卜筮道無以
興乎世漢儒釋之以蒺滋必有通人乃明妙義某官識
窮繫表體蹈環中潛心早慕於仲舒勤學晚同於伯業
發明九事陋何晏之甚疎傳授三爻笑虞翻之未悟既
用其易簡以游斯世又推其緒餘以覺後知載揚闕里
之聲金復振尼山之木鐸何遠之有吾無隱乎某智不
足以安身材不足以補過未究陰陽剛柔之理豈知吉
凶悔吝之幾念河圖之弗傳抱帚編而永歎年已迫於
知命動多昧於趨時夫何憂患之餘獲見微彰之蘊事
斯語矣亦允蹈之運斤成風雖無受至道之質望洋向

若終期造大方之家遇此以還未知所措

以命神靈却欲斷却夫何憂患之禍然其始備之盛事

凶無咎之幾念何圖之惟新賦策雖而亦廢乎已也故

民以安身林不火以斷惡未矣新湖開卷之野豈以古

之聲全然賦以山之木新何遠之有昔無與乎其皆不

用其易簡以新維世又非其教則入學外以薄賦則足

為朋小車動而異之其新萬對三之矣其備之未也則

難大隱集卷五



書